

清

史

稿

清史稿

列傳

忠義七

張繼庚

張繼庚 李翼業等

趙振祚

趙祚

馬善

陳克家

馬則

臧紆青

實元淵

馬三俊

張勳 吳文讓

吳廷香

孫家泰

江圖悃

程漢

彭壽頤

陳介眉

元祈年

唐守忠

吳山

俞焜

嚴烈

張洵

趙世繼 孫麟

汪士驥

金鏡松 雙毛 巴禮 趙國 布澤 等升

包立身

王玉文

孫文德

李貴元等

羅正仁

陳起壽

陳景滄

何霖

蹇譔

趙國澍

宋華嵩

伯錫爾

張繼庚字炳垣江蘇江甯人父介福道光六年進士湖南保靖縣知縣繼庚少有志節補諸生幕遊湖南咸豐三年從布政使潘鐸守長沙圍既解料賊必東竄辭歸省母江甯布政使祁宿藻方籌守禦稔其才招與謀繼庚慮兵不足增募壯勇舉諸生李翼棠等統之明年賊至請仿古火城法於城內開濠積薪城上築兩牆爲孔以出火器城下兩旁設牛皮柵伏精兵以堵賊時宿藻已卒總督不能用二月城陷繼庚率衆巷戰從弟繼辛及李翼棠侯敦詩等皆死繼庚赴水不沉旋陷賊中爲書算自念死志已決欲將有所爲乃以母託戚友變姓名爲葉芝發陽與賊暱盡得其虛實會欽差大臣向榮軍至因與諸生周葆謙夏家銑及錢塘人金樹本謀結賊爲內應而使金和李鈞祥何師孟出報大營有張沛澤者悍賊也同謀而中悔首其事家銑死之繼庚以僞名免九月復遣人上書向榮言水西門賊所不備有船可用太平門近紫金山越城亦易爲力

綠城賊輩皆受約束既得報益結死士張士義劉隆舒呂萬興朱頌齡等以待大軍書七上屢約屢爽城中人情洶洶事垂洩繼庚泣謂其友曰事急矣夜縋入營痛哭自請師期諸將皆感動張國樑欲留之繼庚不可歸而大軍復以兩雪不果至他日繼庚出遇沛澤於途喟曰此葉芝發也執赴賊所施嚴刑不爲動徐曰我張炳垣書生耳焉預他事沛澤食鴉片懼我發之乃誣我耶賊搜之信遂殺沛澤繼庚被繫不得出明年二月金和等引官兵易賈人服入城與諸生賈鍾麟等伏神策門殺巡更賊以斧斷木柵毀其半賊驚走亟舉礮六品軍功田玉梅及敢死士張鴉頭先衆上城斬守賊十餘人援賊牆至玉梅跳兔大索城中鴉頭被獲窮詰不得主名乃益榜掠繼庚楚毒備至時廬州知府胡元焯降賊在坐繼庚躍起謂曰若官江南甯不知江南人孱弱非老兄弟合謀誰敢爲內應者老兄弟賊中呼楚粵人之悍勇者也賊信其言繼庚索賊官册一指賊輒殺之橫尸東門者三十四人賊旋悟曰中汝計矣令速殺之繼庚臨死色不變呼天者三成絕命詞有云拔不去眼中鐵嘔不盡心頭血吁嗟窮途

窮空抱烈士烈殺賊苦無權罵賊猶有舌遂車裂以死事聞贈國子監典籍建專祠予世職張士義乳名鴉頭江甯人故無賴而有肝膽能急人之急在賊中與所素狎者醉歌若無事然繼庚遣劉隆舒招之袖短刀二授之曰汝能殺賊當以功名顯士義慨然曰我何人張先生士義乃下交誓必殺賊富貴非所望也繼庚獄急趣士義速圖衆請於大營遣田玉梅等八人入城助之咸豐四年二月二十二日夜士義與劉隆舒呂長興朱碩齡等凡五十七人乘晦登城遇一賊手紅燈騰身斫之擲首城外以爲信復殺賊十餘人而官軍終不進乃下斬關柵堅不可啟擲火燒之不燃柵內賊起抽矛刺之環城賊皆起角鳴嗚然衆知事不濟遂遁明日賊閉門大索有沈獸醫者首之士義等被執窮其主使士義叱曰欲殺則殺主使不可得也天下人皆欲殺汝獨我哉遂與隆舒長興碩齡俱死是時繼庚以諸生舉義鄉里士慷慨相從者夏家銑字季質江寧人王詩文城陷賊挾充書記作詩罵賊賊搜得之時繼庚內應事洩賊疑家銑知其謀拷掠無所承不知家銑實與聞也賊誘之曰汝有父母妻子以爲質則釋

汝家銑時昏憊遽以母妻對賊至家其妻蔡匿母罵家銑曰汝母死且十年何處得汝母耶遂與妻俱被戮死同預翻城之舉而未死者金和字亞匏上元人性兀傲工詩賦好聲色縱酒飲輒數斗江寧失守陷於賊衣短後衣與賊兵轟飲相爾汝因廉得賊情繼庚爲其妻弟與和通謀和與賊稔出入無所問子身叩向榮軍門請以身質家在賊中不顧也事敗和以質得脫有秋蟻吟館集孫文川字激之上元人敏悟工詩賦洪秀全據金陵以計奉母問道出復入與繼庚謀翻城應外兵終日芒鞋手一筐如丐奔走近賊地不避風雪得賊中曲折具以報官軍因是屢捷而翻城事卒無成嗣習互市案牘知外人情僞英人李泰國購輪船助李鴻章戰既乃要挾索費不受中國進止鴻章聞文川才薦入都盡發泰國陰謀朝廷褫泰國總稅務司職遣船回國事得解以功游擢知府著讀雪齋集周葆濂字還之江寧人詩才清麗陷城中與內應事謀洩脫歸選寶應訓導著且巢詩存汪汝桂字燕山上元人幼負奇力或勸入伍及應武童試皆不可初陷賊中追者至手批殺一賊擲過濠而免田玉梅入城汝桂與俱

往還習繪事畫仕女尤工吳復成字蔚堂上元人性慷慨賈於粵久咸豐初始歸賊陷金陵與人語多不辯惟復成解之以是爲賊所信因說賊設機杼織緞匹川匠十萬人文弱陷賊者得以免又說賊造船運柴薪賊稱其能婦嬰緣是遁者又六七千人既與繼庚謀內應事洩奔向榮軍不知重也及曾國藩欲謀賊虛實或以復成薦因蓄髮入賊中得曲折以告曾國荃圍金陵李秀全自蘇州來援賊掘地道出攻復成偵得之報國荃爲備遂大破賊以功叙縣丞不就卒以賈終胡恩燮字煦齋江寧人與繼庚謀內應出入賊中者三十六次破衣草履涸跡如丐往往伏濠內或潛立橋下堅冰中屢瀕於危母陷賊中以奇計脫之後以功叙知府田玉梅字鼎臣四川酉陽州人入應事起求政內成者吳復成以書抵玉梅玉梅裹紅巾挺身從復成行數日出言賊情如繪向榮乃信任之奪門既無成明日賊殺張士義等百餘人不得主名則令領石達開憑帖無者逮訊復成領數百紙貽諸同志玉梅手一紙立通衢髮短言異見賊往來反詰之賊竟無知者乃偕八人者俱出後以功叙河南同知直隸州補太康縣

知縣十年英法國聯軍犯天津京師戒嚴請濟師勤王太府不許自帥所部至汝陽沙官橋爲捻匪所阻憤極死戰被戕卹贈太僕寺卿諸人於是役皆冒死爲之例得附書以竟事之本末

趙振祚字伯厚江蘇武進人順天宛平籍道光十五年進士改庶吉士授編修兩遇大考皆前列二十二年遷詹事府贊善咸豐三年寇陷金陵蘇常震動振祚上書當事願歸本籍辦團練奏請報可遂歸集貲置保衛局募兵購械仿行保甲人心以安常州北門瀕江焦湖船屢出剽掠積爲民患振祚乃擇要隘口岸立稽查卡房并設水師戰艦嚴備以待境獲寧輯六年賊艘蔽江下鎮江幾不守避難者絡繹振祚固結人心訓練士卒率衆詣丹陽會督師者赴援圍乃解賞花翎加翰林院侍讀銜時總督何桂清駐常州郡人編修趙曾向出其門振祚素輕之以是常訐其短於桂清遇事齟齬曾向被命佐常州團練益掣其肘不得已請解事保衛局遂廢十年和春軍潰丹陽常州大警桂清宵遁曾向亦舉室渡江而北於是紳民復請振祚出督團勇是時兵單糧絕寇氛日迫

事已不可爲復毅然誓衆固守並率所練五十人出城招集潰勇會北鄉石堰士盜盪起遂領衆往捕以衆寡不敵戰失利力竭死之常州亦旋陷事聞贈太僕寺卿子世職同治三年李鴻章疏稱其六世祖尙書趙申喬爲康熙時名臣子姓分居蘇常江浙淪陷男女死者四十三人其弟浙江經歷振禮亦死於難得旨予振祚常州建祠餘附祀振祚抗爽重節介口素吃遇不平事憤懣謫罵期期不避人故多遭怨然好獎借人才人亦以此多之善詩古文詞精漢學著有明堂考一卷文詩集若干卷同族起道光舉人同時城守城陷命合室婦女自沈園池遂整衣冠坐廳事賊至有誠起者勸令自全大聲叱賊引刀自劉子諸生曾寅以身衛父刃賊數人被害兄子浙江候補知縣祿保罵賊死尤烈馬善字遇臯長洲人世居蘇垣北鄉有智略膂力過人咸豐十年閏三月金陵大營潰總督遁賊席捲而南夏四月丁丑蘇州陷善先受檄主黃土橋團練集七團義勇三千人朝夕訓練比水陸戰守具聞變嚴陣以待明日賊果至迎擊金巷橋又明日賊大掠八字橋又趣援之越四日賊分兩路至一出齊門至宜

橋一出閭門至禪定橋善率勇千人自當宜橋遣子安瀾率勇數百當禪定橋先後均有斬獲賊將竄常熟夜遣安瀾率千人潛至八字橋盡括岸側灰窰遺棄甌瓦塞遠近橋下居民已空無知者越數日賊船至不得過城賊約沂關賊至青黛湖合宜橋禪定橋三路並進善分兵拒之而自繫青黛湖失利賊旋退已而賊大至善設伏青黛湖畔遣弟增及安瀾誘賊入湖伏發勝之獲賊船十俘賊首攀大福梟其首賊爲奪氣僞忠王李秀成憤不得逞大舉來攻善盡銳禦之自辰至午殺傷相當賊退團勇歸局午食賊遽掩至善率親兵迎戰手刃騎馬賊三人傷於胸猶疾呼殺賊飛鏃中頭角而踏安瀾方赴常熟請軍火馳歸歛之面色如生當是時詔舉團練吳人脆弱賊至則靡獨善以能殺賊聞恤贈知州銜給世職安瀾後從巡撫李鴻章軍嚮導得力卒復蘇州

陳克家字子剛元和人道光二十四年舉人少英異爲桐城姚瑩所器重抗心希古落落寡合文章自許北宋儷體宗六朝詩學黃庭堅咸豐三年挑教職時金陵爲賊據欽差大臣向榮駐師城外翼長福與阿聘克家入幕福遷去江南

提督張國樑復聘之十年閏三月國樑檄克家主健勇營事十五日賊大至督弁勇迎戰兵敗死之克家之死也營中大亂求屍不得克家祖鶴熟精明代事爲明紀一書用通鑑義法崇禎三年後猶闕克家續成之合爲十六卷馬釗字遠林長洲人與克家同歲舉人治經學有名咸豐三年前江蘇巡撫許乃釗副向榮統兵金陵釗入許營時有川楚兵所帶餘丁率驍勇而蘇垣空虛釗建議募爲一軍得千餘人號曰撫勇粵匪劉麗川反嘉定土匪周立春繼之連陷青浦等六縣向榮檄釗率撫勇捲甲赴之至青浦夜半銜枚薄城克之獎內閣中書銜事定重赴金陵十年春浙江告急借總兵熊天喜赴援復四安鎮廣德州奉調馳回遇賊丹陽戰白塔灣中鎗死二人以文士從軍卒死於陣吳人稱之臧紆青字牧菴江蘇宿遷人道光十一年舉人自少倜儻好談兵所交多不羈之士當英吉利入寇紆青見武備廢弛人不知兵寇至多被殘害因團練鄉兵凡萬人嗣入靖逆將軍幕府將軍主和紆青獨主戰後以和議成奏獎同知銜不受曰以和受賞不亦耻乎嘗以邳州知州勸捐案被牽涉查辦大臣周天爵

雪之時粵逆陷安慶據江寧淮南北捻匪乘釁爲亂衆黨多者至數千人與粵逆互爲聲勢天爵因疏請紆青練勇勦匪且聽自成一隊匪素懼紆青威名稱之曰老虎兵所至撲滅解散多願歸附效死者天爵卒副都御史袁甲三繼任亦深倚之累擢通判賞四品銜先是桐城以三年十月失陷士民先後乞援於圍廬州提督和春圍舒城提督秦定三幾年皆不應甲三時駐兵臨淮念桐人請救之殷又欲取安慶以截江路自請進剿文宗以臨淮扼南北之要不許甲三於是疏請檄紆青勦辦允之時侍郎曾國藩已克復武昌破田家鎮順流東下使提督塔齊布道員羅澤南進攻廣濟黃梅朝廷既允甲三請復以國藩兵屢捷於是命紆青速進兵潛太接應時和春秦定三軍皆久無功詔旨切責令速破賊以圖會勦紆青又得國藩書相期會於是疾馳至桐兩敗賊於大關呂亭驛追至城下時四年十一月六日也紆青以舒廬圍師率離城十餘里不斷賊出入餉道以故久無功桐之南門通安慶賊來援則當其衝遂自率兵勇圍之而令參將劉玉豹同知李安中圍東門時攻城之器未具城堅不可猝拔

賊既敗於湖北又懼桐城或破則與湘軍成夾擊勢悉力來援紆青先後迎擊於王林莊挂車河皆勝之追至陶冲驛擒斬既多獲械無算卒以舒廬軍不予接應又不急攻城以分賊勢賊用是得專事援桐玉豹安中又性懦無能當賊紆青至以諸君不能戰不能攻又不能守事事須我一人諄之弗恤也十七日賊援大至玉豹安中卻走城賊復突出西門焚營紆青與諸生張勳殊死戰殺三百餘賊以後無繼者賊伏遽起紆青胸面中二十餘創死焉紆青既死賊復得志武昌再陷紆青治兵有紀律初賊以土匪目官兵以惑民聽至是一洗此耻桐城破後凡先以助餉剛練賊皆甘心焉民以紆青來秋毫無犯雖被禍無不感泣思之事聞賜三品卿銜予騎都尉世職後有寶元灝元灝邳州人咸豐元年舉人援例爲員外郎分刑部八年擒賊大燧竄徐州邳當其衝元灝集鄉團先後偕知州畢培貞周力城都司濮楓等堵剿擊斬甚多十年州城被圍守禦四晝夜城賴以全賊結幅匪大舉由蘭郟渡河元灝與參將于殿甲合剿被圍力竭死贈太僕寺卿銜賞世職

馬三俊字命之桐城人祖宗璉父瑞辰皆進士以經學顯名三俊能世其家顧屢困鄉舉咸豐元年以優行第一貢太學又舉孝廉方正制科三年安慶失守桐人恟懼知縣遁去姦民蜂起官兵往來境上亦乘亂爲患獨縣學生張勳誓死不避三俊亦急起而坐鎮之擒斬爲首者十數人又偕勳立法勸富家給散貧者亂稍定賊既陷安慶盡趨江寧諸統帥皆遠避置安慶蕪湖不堵截三俊知賊之必回竄也日夜在明倫堂訓練鄉兵又時與勳往四鄉聯合團衆於是桐城練勇名聞江南北賊犯太湖與勳揚兵堵境上賊莫測虛實莫敢逼已而賊攻江西不克回據安慶修守備桐人大恐巡撫李嘉瑞駐廬州前按察使張熙宇駐集賢關皆畏安慶不敢至三俊上書巡撫其略謂制寇之道必能攻而後可守守禦之策必先據要害而後可保城池全州不守禍及湖南岳州不守禍及武昌小孤不守禍及安慶安慶不守然後禍及江甯鎮江揚州大江南北此明驗也自粵西起事以來賊之所破多不守而破非因守而破也賊之所收多不戰而敗非力戰而敗也觀桂林長沙南昌開封四省城苟能死守賊未有

陷之者六合小邑殺賊數千而賊不敢至江浦含山許州皆以守而得全不大可見乎今江北全勢完固虛實未爲賊覺而安慶之賊又皆江西殘敗之餘且未齊集望於此時迅速進攻而分兵守桐以爲接應如安慶不利當可退守桐城以爲舒廬之際此機一失賊或竄桐舒以入廬州則與北匪構結河南北東西畿輔之地危矣巡撫趙其言遣總兵恒興與熙宇合軍堵勦實不前進十月賊大至熙宇恒興兵皆卻走三俊獨與勦率鄉團數百人拒之不利賊遂道桐城以入舒城陷廬州渡河而北蔓延千里皆如三俊所料城陷時三俊父被執不屈死三俊以不孝不忠自責誓復讎報國四年夏與前任桐城知縣成福六安參將慶麟招集義勇於霍山請助官軍殺賊且言事成不邀功賞事敗則以身死之於是上三路進兵策而自任桐城一路先頓兵中梅河以俟而提督秦定三軍之圍舒城者延期不進三俊既孤軍深入耻不肯退至周瑜城援絕餉匱姦民搆賊夜襲營力戰死之勳字小嵩與三俊同縣人家貧好倡舉義行營搜羅桐城節孝貞烈婦女二千餘人無力上聞者彙請旌表著總旌錄四卷桐

城既破三俊起義兵霍山與之定計即往見秦定三以急擊舒城與雙桐之師相應說之定三不應事遂敗嗣聞紆青統兵至桐往六安迎之謂紆青曰桐近日賊勢與前不類兵單援寡難操勝算不如先助攻舒舒破與秦軍合事乃有濟又數以書勸定三卒不應紆青亦不肯往十一月十七日遂隨紆青督戰死之隨死者有吳文謨文謨字翼甫亦同縣人年少負氣與三俊子復震爲友三俊死文謨不告其子獨冒險往獲其屍動重其人遂隨動奔走請兵不倦殉節時年二十有一

吳廷香字奉璋廬江人敏博沈毅與桐城戴鈞衡馬三俊友以文章風節相砥礪以優貢生舉咸豐初元孝廉方正上書論時事有國士之目三年粵賊東下陷安慶廬江土寇應之駸駸迫城下邑團練鄉兵推廷香爲督擊寇禽其渠斬之盡破其黨尋粵賊棄安慶去長驅薄金陵踞其城是年夏復遣悍酋沿江西犯再陷安慶皖北震動廷香復倡義募鄉勇六百人自率之守梅山黃姑闡遏江路時賊張甚官吏兵民所在迸散賊自桐城北擾舒巢無爲相繼淪沒獨廬

江賴廷香固扼得全十一月廬州陷巡撫江忠源死之官軍團練望風逃潰十二月廬江亦不守廷香時在防次扼腕慷慨誓必得當以報國四年二月提督和春敗賊於廬州七月提督秦定三大捷於舒城舟師復自海道入扼東西梁山斷賊歸路賊悉衆北趨諸州縣守賊少曾國藩復率大軍下武昌廷香聞則奮然起言於衆謂誠以此時出賊不意復邑城益與江上下諸路軍相應合謀以圖皖中賊可殲也乃召募三千人與外委熊允昇將之趨縣門兼密約舊時勇目居城中者爲內應八月大破守賊賊渠任大剛走追斬之遂復廬江大江東西以鄉兵敗賊克城蓋自廷香始既賊知廬江無援合安慶桐城諸路來攻廷香出擊屢有斬獲而賊衆益衆江中賊亦逼城下廷香豫乞救廬舒大營久未報及賊大至何桂珍檄蔡蓴沈承貽以六百人自六安赴援至邑則縱兵大掠遇賊反走賊益焚四野火光燭天廷香夜登陣望救不至搏膺泣曰吾志清逆亂不克而重禍鄉里勢窮援絕來者非人吾死此分耳亂將若之何數日糧竭募承貽引遁城遂再陷廷香率死士巷戰自午夜至黎明從者僅三人力盡

死之尤异同及於難初廷香將倡義或危其事尼之廷香從容曰如若言亂將誰拯耶其人悚然退及事急將自裁或奪刀掖之行廷香抗聲曰復城守城雖非吾責吾義也城危而走義何居焉出郭一步非死所也比戰沒邑人求得其屍葬之詔建專祠廬江予世職子長慶繼其志累官至提督以功顯

孫家泰字引恬壽州人大父有善行仁宗嘗書盛世醇良四字顏其門家泰生有殊稟嬉戲異羣兒每出語長老驚若成人未冠補諸生道光二十九年入貲爲員外郎分刑部廣西司治牘明決爲上官所器咸豐三年粵寇竄擾江皖工部侍郎呂賢基奉命回籍督辦團練請以家泰從時皖南北郡邑相繼不守官吏望風避走羣盜蜂起定遠陸遐齡倡亂據城道路梗塞朝命再起周天爵爲安徽巡撫天爵就詢策略家泰密爲畫數旬之間遐齡父子就禽脅從解散餘盜斂跡壽春兵以驍勇聞軍興徵調四出留鎮者少又乏食巡撫檄家泰勸捐募兵爲固圉計壽故繁庶富家大賈務厚藏鮮遠識無應者家泰則盡貨其資產以濟用所募皆敢死士明賞罰嚴簡練一軍肅然廬鳳穎六安諸寇憚其

強不敢窺尋天爵卒於潁州舒城再陷呂賢基死之家泰失所隸勞遂孤尋爲人所構吏議落職家泰語人曰時事糜爛守土之吏畏賊如虎狼而視民如魚肉是驅良入於暴也吾無死所矣自是杜門家居口不言兵事既毀家佐軍貧甚菽水養親晏如也既賊氛益熾諸州縣團練多陰附賊而鳳臺苗沛霖所部尤橫桀不可制初沛霖爲諸生請於知州金光筮欲練鄉團而自爲練總光筮不之許沛霖遂聚羣不逞爲亂鄰邑豪猾多歸之官軍畏其衆遣人招撫授以官爲羈縻計數年累薦至川北道加布政使銜沛霖不奉命南據正陽關北扼下蔡繼襲懷遠陷之號稱苗練駁駁逼壽州壽人洵懼謀聚保衆議非家泰莫屬辭不獲強起號召部曲上書軍帥力主勦未報沛霖遣諜入壽州家泰殺之沛霖益怒盡發其黨來攻守者恐不敵忌家泰者乃倡言獻家泰與其副蒙時中於賊以紓壽禍有司迫行衆大譁將以力抗家泰夷然曰吾昔募健兒刺苗逆悍將今又戮其謀欲甘心者我也守土非其人順逆不明至此事之不濟天也吾身許國矣吾死而城安其又奚恤遂仰藥死既歿按察使張學醇復縛時

中付賊寨并遇害是年九月沛霖卒陷壽州家奉家屬被執不屈皆死之同治二年科爾沁親王僧格林沁督師至沛霖敗死壽州平聞家泰一門死事狀於朝詔贈四品卿照陣亡例賜卹建祠壽州父贈祖弟家彥家德子傳洙咸卹贈有差

江圖惻字汝華旌德人富膽略經商寓舒城侍郎呂賢基辦團剿賊過舒城與圖惻一見相契特命帶鄉團扼守舒城衝要賊不敢過三年十月桐城被陷乘勝至舒城賢基戰不利死之圖惻猶力戰狂呼殺賊久之賊至益衆援兵不至沒於陣圖惻前以助餉贈知府至是歿舒人義之相與私諡曰仁惠宣統初補諡莊潔程葆欽縣人道光十三年進士以主事分工部咸豐二年六月外授廣東肇慶府知府時粵匪廢集皖境謀犯浙江葆赴任道經杭州巡撫何桂清奏令回籍治鄉團助剿五年賊陷休寧葆率民團出境援與官軍會擊於東南二門斃賊目賊驚退入城諸軍連夜進攻賊山西門遁遂拔休寧乘勝克復石埭自是葆益激勵鄉團屢助官軍剿賊徽郡肅清旋檄赴杭助守城陷死之

彭壽頤字子文江西萬載人道光二十九年舉人咸豐四年粵匪連破江西郡縣知縣李皓棄城遁壽頤率團練禦賊追勦上高新昌皆捷以籌餉犒李皓皓和奸民壽頤揭前棄城事巡撫陳啟邁夙諱賊恐上聞以蜚語誣捕壽頤欲致死滅口欽差大臣曾國藩奏言數年以來諭旨諄諄飭行團練多無實效惟湖南平江縣江西義寧州以本地捐款練本地壯丁屢殲悍黨爲賊深畏四年義甯之捷巡撫陳啟邁冒功濫保徧私親暱人心解體團練遂散賊再攻州抵拒經月省兵竟無援救城陷屠民數萬向使練丁尙存何致慘禍如此五年饒州廣信之失鄱陽興安之失陳啟邁通融入奏寬減處分萬載之失知縣李皓有避賊重咎舉人彭壽頤有剿賊殊功奸民彭三才有餽賊實據陳啟邁竟袒庇屬僚架誣團練義士餽賊不斥避賊不劾獨於剿賊者目爲豺狼指爲逆黨臬司惲光宸逢迎喜怒褫革逮拘酷署重刑百端凌虐臣以壽頤才識卓越深沈疊尙留營効川陳啟邁堅僻不悟釀成冤獄義甯之團以保舉不公毀於前萬載之團又以訟獄顛倒毀於繼人心何由固結大局恐致貽誤奉諭陳啟邁革

職俾光宸交新任巡撫文俊查辦壽頤早以刑斃矣南昌梅啟照管云國藩雅度無怒容惟於壽頤速獄深爲憤痛七年劉長佑敗新喻袁州三縣民率丁壯助軍軍復振世益以此思壽頤

陳介眉山東濰縣人道光十八年拔貢生朝考用知縣發江蘇署宿遷鹽城等縣擢通州知州屢獲海洋巨盜擢知府授河南歸德府知府咸豐三年捻匪竄虞城之楊家集介眉督兵追殲三百餘生擒二百餘粵賊陷歸德褫職回籍十一年捻匪竄山東抵濰縣介眉迎剿與候選訓導陳威鳳武舉譚占元等均力竭陣亡復原官卹贈太僕寺卿銜賞世職建專祠并祀威鳳占元及同日陣亡之武生千總銜陳執蒲等同縣人元祈年道光五年舉人截取知縣捻匪熾祈年治西鄉團練匪竄縣境祈年登圩固守圩破率衆巷戰力竭被縛罵賊不屈死姪文豐等同時陣亡卹贈道銜賞世職建專祠文豐等附

唐守忠鉅野人咸豐初爲平陽屯屯官四年粵城陷鉅野土匪竊發守忠聞警馳歸遭匪劫僅以身免與鄉人生員張桂梯職員姚鴻杰等議舉團練爲守衛

計旬日集義勇五千餘人分三隊捕斬土匪數十名賊遂遁嘉祥鉅野間悉平土匪懼以所劫物輾轉還守忠並乞隨剛勦賊誓不爲亂守忠察其誠納之時年饑人乏食守忠使子錫齡偕張桂梯各村勸捐助賑富出資貧出丁括計餘糧計月分給謂之均糧而團練之勢愈固曹州濟甯兩屬鄉團來附賊不得逞去五年河決銅瓦廂鄆城鉅野嘉祥等縣當其衝守忠聞豐工黃水下游淤涸成灘官出示招墾因率災民數萬人南下認種仿屯田法以教諭王孚千總唐振海等分領之名曰湖團亘二百餘里濬溝築圩編保甲嚴守望徐州蕭錫豐沛等縣人聞賊警則相率投避得免於難者數年八年捻匪來犯守忠率團遮擊擒賊樊三丁豹等斬之叙功給五品頂戴十年欽差大臣僧格林沁令守忠隨官軍助勦敗賊大劉莊同治元年捐助軍餉又捐已墾熟田爲魚臺書院經費二年白蓮池教匪由滕縣偷渡湖西守忠截擊生擒賊目陳周等多名餘匪悉遁四年九月捻匪張總恩任柱等悉衆來攻守忠集丁堵禦一再請援兵不至力戰六日衆寡不敵死之方守忠被圍賊數使招降守忠誓死拒之及戰敗

與族叔千總振海子生員錫彤同被執賊昇至銅山袁家廟多方脅之降守忠罵不絕口遂併見害江督曾國藩疏請優卹建祠立傳從之贈道銜子錫彤照四品以下陣亡例議卹給世職尋在沛縣捐建專祠

吳山字巖青河南光山人生三日喪父母周守節撫孤家極貧紡績供山讀書道光二十五年舉於鄉會試不第留京三載與袁保恆裴季芳相切磋聲譽日起時光山有匪患山以寡母在堂二子尙幼又無期功強近之親就揀選知縣職倉卒歸先是邑民郭三凶黠兄弟七人郭五郭六尤悍郭三充縣皂役滿布黨與知縣水安瀾懼爲郭三等挾制無所不至彼時有郭滿城之謠郭三充臥龍台鄉保倡首爲匪向四楞子曾傳佐等皆領杆頭目肆行劫掠並至各鄉按畝加糧供食並句通毫壽各州各匪謀殺官起事山有鄉望衆舉爲團首倡辦團練地方恃以安而郭三忌之咸豐四年四月郭三糾衆突至小向店派糧山拒而不納尋集鄉團與之抗匪巢臥龍台距小向家集僅十二里郭三揚言非殺山不可或有勸山走避者山曰我所以觸匪怒者原以抗匪派糧若臨難

而逃任匪所爲則初志謂何今日之事有死而已遂挺身督鄉團與戰衆寡不敵被擒山罵不絕口匪怒戕之後俞御史劉毓楠奏建專祠

俞焜字昆上浙江錢塘人嘉慶二十五年進士改庶吉士授編修道光十三年遷御史奏請申明律義以正倫紀略言律載弟妹毆同胞兄姊死者皆斬注云毆死期親尊長若分首從則倫常敦矣此古今定律所以維名教也其聽從尊長毆死以次期親尊長之犯向律擬斬定案時夾簽聲請疊經改爲斬監候歸入服制情實自道光三年御史萬方雍奏將聽從尊長毆死以次期親尊長下手傷輕之卑幼均科傷罪刑部定爲條例至今沿之因思例從律出例因時變通律一成不易致死尊長豈得仍論傷之重輕今以勉從尊長下手傷輕止科傷罪則與死者皆斬之律未符此例既百無一抵何以肅典刑而正人心請仍遵不分首從本律夾簽聲請以昭平允下部議行十七年授河南彰德府知府以東河大工勞最用道員擢永定河道調衡永郴桂道緣事降調咸豐九年督辦團練操防勤奮復道銜十年粵賊亂焜商遣駐防軍守獨松關李秀成犯

杭焜與侍郎戴熙登陴拒守二十餘日城陷巡撫羅遵殿殉之焜憑柵堵禦與滿城犄角復相持五日彈盡柵毀賊衆焜猶手刃數賊矛洞胸歿于陣明日張玉良援師入將軍瑞昌會擊賊卻而焜已死論者謂滿城之存焜有力焉賜諡文節建專祠同殉之繼室陳氏女蘊祺蘊璿附祀同縣戴煦字鄂士增貢生候選訓導精算術西人艾約瑟見煦所著求表捷術心折之又工畫神似倪迂評者謂出乃兄熙上熙既投水殉節聞之歎曰吾兄得死所矣亦投井死著有莊子順文陶靖節集註四元玉鑑細草對數簡法諸書熙自有傳

張洵字肖眉錢塘人咸豐二年進士改庶吉士授編修命在上書房行走文淵閣校理十年粵匪由安徽竄浙江杭州省城被圍巡撫羅遵殿奏入洵請假省親上召見垂詢浙省軍情洵抵浙江杭州失而旋復先是洵母談氏因賊逼杭城率洵妻施氏洵子惇典從典叙典念典女喜姑闔門赴水被救得不死施氏即命惇典念典等護其姑出城賊至施氏遣喜姑先投井死自率叙典躍池中殉焉杭州將軍瑞昌以聞上嘉施氏孝義兼全下部旌卹尋洵母自以老需人

侍奉爲洵繼娶勞氏未幾丁母憂洵省城無房產僦居於仁和縣之永泰鎮十一年賊大股復犯浙江餘杭蕭山相繼失陷省城被圍洵念受恩至重不忍坐視乃自永泰鎮挈眷赴省與官紳籌守禦並謀諸巡撫王有齡會合駐防兵力通江路顧賊勢張甚圍城兩月餘城陷洵與勞氏悼典從典念典皆死之洵兄廉之妻李氏及女九姑亦先後殉焉方城之垂陷也洵聞警即素衣冠北向叩頭畢賦詩三絕有白雲堆裏吾將去前輩風流有戴公之句書竟授僕張升遂投井死同治元年太常寺卿許彭壽以聞以一門六口同時殉難實屬深明大義忠烈可嘉褒之八年國子監司業孫詒經復請加恩予諡建祠允之諡文節鍾世耀字嘯溪仁和人道光二十一年進士改庶吉士散館授兵部主事移疾歸負鄉望城再陷賊將授以僞官絕粒殉節孫義字樸堂錢塘人道光九年進士官福建仙游縣知縣有循聲告歸後課徒自給同時殉難

汪士驥字鐵樵錢塘人襲世職授杭州營千總擅詩名工篆隸晚年作小楷尤精咸豐十一年賊再至先以年老休致居危城中神色自若日以忠義訓家人

賦詩有我死家人生辱家即辱我等語城破全家皆躍水死錢松字叔蓋錢塘人嗜金石篆刻有文譽賊初陷杭垣先期具藥汁誓死家傍清波門賊從此入遂與家人同仰藥麾侍者還其室曰今日得死所而男女顛仆一室可乎語定而絕毛雝字西堂錢塘人諸生事親孝年十三能作大字工書得潤筆盡給貧乏督辦東北隅團練城再陷自縊死魏謙升字滋伯仁和人九歲能文弱冠後雄長壇坫尤工書以廩貢生選仙居縣訓導不就家居西馬塍以著述自娛垂五十年有書三味齋稿賊自湖州逼省城家當其衝或諷宜移居避之不應賊火其廬乃挈妻子走靈隱山中賊退僑寓城中嘯歌不輟自號無無居士城再陷謙升方老病驅至萬安橋下死妻周氏同時殉節周能書世以鷓波夫婦擬之金鼎燮字承高秀水人諸生咸豐季署臨安訓導兼教諭以事詣省城寇至圍久糧絕至煮篋上草以食城破雜難民中出至臨安率鄉團禦寇死之庚辛之役省城再陷杭人殉難者至衆而旗營死事尤烈其著者協領巴達蘭布等守花市營門佐領德克登額佛爾國納德勒蘇等守錢塘門呼松額格勒蘇印

福等督隊出湧金門皆迎戰奮力殺賊先後陣亡又協領賽沙春連生等佐領薩音納伊勒哈春等防禦貴祥明阿納等驍騎校志善佛爾奇納等文職如知府伊麗亨等武職千總安忻保等皆陣亡合營縱火自焚男婦死者八千餘人包立身諸賢人家五十八都之包村世業農性樸魯里黨莫之重咸豐十年忽能言休咎多奇中節食茹素夜則結跏趺坐時賊氛漸逼人懷憂懼爭奔詢立身惟以行善爲勗人疑信參半不知其嫻武略也十一年九月賊陷紹興府他賊復自金華來諸賢亦陷於是首倡義旗從者響應村踞山三面皆水田惟一路由陸埒達村賊焚掠至其地立身以靜待動入者輒爲所斃避賊者擲投之棲止無隙地乃益選壯勇成勁旅賊來攻數不勝立身不出村勦賊賊至則戰戰則身先當其鋒立踣衆見賊易擊雖文弱者亦揮戈從事間謀入村者罔弗獲無事則焚香默坐有所指揮從之必勝遠近驚以爲神賊憚甚使素稔立身者招降立斬之乃悉糾數郡悍黨更番進攻而往者輒輟羣賊聞調攻包村如就死地相持八九月大小數十戰斃賊十餘萬精銳強半盡賊目有周姓者眇

而通形家言乃周覽村外悉其川源山脈會旱溪流弱賊壅其上流遂無涓滴
村外非水賊舉腐屍填之出汲則先以火器越井而陣後人出戶乃得汲腥穢
不可飲然且難得人衆食寡賊又四面斷糧道不得達賊遂索戰無已時每合
陣所損相當勢不能久持終無一人言降者賊遂陰穿隧道而以金鼓聲亂之
立身不之省七月朔日賊穴隧道自村社廟出即縱火焚廟衆出不意大亂賊
遇人即殺未遇賊者亦倉皇圖盡立身見事敗與其妹鳳英率親軍數千人死
戰潰圍出至馬面山賊逼之圍數匝鏖戰不得脫中礮死鳳英亦力竭自刎死
全家皆遇害從者亦無一得脫合村死者蓋六十餘萬人

王玉文字緯堂金華人性強毅好談經濟道光二年舉人咸豐四年授於潛教
諭會粵寇據金陵數上書當道論兵事指陳兩浙形勢甚悉既而浙壤告警奉
檄領兵守天目山又令暫於潛臨安山谷防賊闖入既至躬自履視得某關廢
址實爲要隘因建言修之初借昌化教諭高文祿行團練於潛令素與玉文忤
多方撓之及是議築關益譁然以爲多事而玉文銳於自任不之顧十年賊陷

杭州王文將百人扼關欲乘賊歸擊其惰文祿力贊之於是昌化臨安新城及本境山岷咸持槌願受節度官紳交阻之事遂寢王文患甚乞病歸甫束裝聞寇至歎曰臨難而去非夫也迺輟行適援軍至王文戒以守關毋出不聽戰五晝夜衆寡不敵棄關走賊入城官皆遁有門下士偕二輿夫一擔者來迎王文堅不去迎者旋散迺朝服挾刃坐一賊當先入格殺之即舉火自焚遺書付其子曰天熱吾清白之體不可俾燻蒸有鹽硝舉以自化汝曹毋過悲痛也寇退得其屍池水中朝服燕去跣一足衆哭殮之以其先有告病牒大吏不以殉難聞士民咸以爲寃

孫文德嘉善人咸豐十年年八歲賊陷嘉善家人攜出城遇賊相失獨至村舍薄暮十餘賊入舍就炊將休矣文德潛乞砒毒於賣藥人何桂生密啟釜置之飯熟賊方飢食之斃九人二人未食大駭考掠文德奮身大罵賊殺之李貴元字祥枝永康人事母孝以強有力聞賊至年已八十乃出其大鐵錮擊賊賊懼不敢動貴元從容登樓及羣賊擁至貴元遂遇害越日其子求遺骸以出賊亦

不之罪也時錢塘汪玉璋義烏金士玉長興副貢生王泰東均年踰八十先後預於難富陽著者陳小福避山中從賊者識其神卜也囚之官兵攻急賊勢蹙乃命之卜小福曰若輩必盡死無遺類何卜爲賊怒剗其目磔之皮匠某逸其姓名十一年圍急闕兵絕糧不欲戰巡撫王有齡登陴泣匠忽手百金至叩首曰小人勤苦蓄得百五十金今留五十金自贍餘請助餉有齡爲榜示轅門示勸城陷匠自經死

羅正仁湖南郴州人諸生咸豐三年土匪蜂起三月十四日夜半突有賊數百人攻入城戕知州胡禮箴正仁急起倡辦團練獲賊二十餘人殺之由是各處效法不數日諸匪咸撲滅餘郇恨正仁刺骨會粵匪陷州城土寇與合正仁復率團要擊之賊懸賞購正仁正仁走避久之聞母病歸賊偵知一日昧爽突有賊三人至其家正仁猝無所備乃率二子春官等禦之俄賊衆奔至衆寡莫敵遇害二子亦受重創佯死得免後春官痛父更集團日以勦匪爲事五年城再陷率團復攻之每戰奮不顧身多斬馘爲鄉里所倚庇同州人陳起書字通甫

幼從兄起詩講求經世學由附貢生候選訓導道光十三年逆搖趙金龍叛起書條陳禦搖策知州姚華佐多採用之州城得無患金田賊起起書謂西粵一隅地賊不能久居必竄楚竄楚則大軍必扼衡州郴桂將首受禍遂畫守禦之計州牧不能用乃糾同志自集團丁於觀音寨大頭隴並築堡修牆爲堅壁計無何賊果至聞州境有備遂引去時土寇邱倡道煽亂擾及閭里上官檄官軍勦之不獲起書命次子善墀賊張樹榮依計誘擒之並獲賊渠黃中鳳事平成豐五年四月廣東賊何祿寇陷宜章五月州城陷起書率團練扼北鄉賊不敢犯有東鄉賊鄒招起書爲畫守禦策適湘鄉王鑫率師由衡州來援乃命善墀迎師自往東鄉行抵塘溪擬聯絡搖嶺鄉民以拒之而土匪咸通賊偵其往中道要劫之遂被執羣賊久耳起書名擁於坐宛轉誘降起書罵不絕口抵死不降賊遂計議俟何祿至乃縛其手日夜環守之起書於八月七日絕粒死之陳景滄字少海龍陽人父永皓直隸長垣知縣有聲於時景滄幼凝重守道義留心經世之務以咸豐元年舉人官內閣中書粵亂作湖北巡撫胡林翼治楚

軍備賊徵辟賢俊以景滄佐軍事積功保知府命籌餉岳澧景滄剔除宿弊事
集而民不擾嘗曰籌餉病民已非善政若更貪其利是官民交病吾不爲也不
數年以親老辭歸里閉戶山中侍養之餘以讀書爲樂同治六年閩浙總督左
宗棠調往福建湖南巡撫劉琨亦強起景滄景滄咸謝不赴八年丁父憂哀毀
廬墓益遠人事初軍興募民爲勇越境擊賊湖南尤盛賢賊平勇散歸不事生
業相率入哥老會哥老會者起四川異姓相約爲昆弟同禍福結盟立會千里
相應其盟長之大者輒擁衆數千人橫行郡邑吏莫敢詰良懦憚之則入會求
庇入者既衆勢乃益厚流行湘楚間初但爲奸盜均其財繼焚掠郵市抗官兵
窺城邑長沙衡州諸屬屢撲屢熾十年益陽何春台龍陽劉鳳儀劉繼漢等率
會衆爲亂聚縣西安化山中距景滄家十餘里景滄聞變急密告巡撫巡撫檄
益陽龍陽兩縣往捕會衆方傳檄諸州縣黨人約同時發難未至期捕者適至
遂先舉事犯益陽途中值景滄執之景滄責以大義數其罪被數刀罵不絕口
賊羣斫之長子克標次子克權從行以身障景滄並及於難景滄長身玉立恂

恂孝友與人交訥然若不出口至論古今忠孝及國政得失輒慨流涕義形於色事聞贈道員給世職

何霖字兩人廣西興安人少讀書以諸生食廩儼抗志高尚不屑屑治章句性沈毅有膽略咸豐三年興安盜王苟滿趙廷蘭等作亂陷縣城囚官吏霖聞變匿老弱自與族弟進賢急詣省求援中道遇賊爲所劫霖詭辭脫進賢入見賊曾賊素重霖以上賓禮之霖謬爲甘言飲啖自若酒酣因說賊曾曰君等舉大事宜先收人望蔣方第諸人邑之豪俊願假良馬利劍爲君輩致之非常之業可圖也賊喜如約霖遂以方第等六人至留賊中賊信不疑霖陰謀方第間賊黨將乘間舉事會官軍擊賊靈川屢勝賊分兵攻金州亦敗衆稍稍引散霖遁歸借方第一夜集鄉兵盡縛北鄉諸賊分守要害號召鄰鄉團衆分三路攻城賊不爲備遂復興安禽苟滿等官軍至獻捷主兵者懷其功賞不及霖益與方第倡言興團練立規約厚俸給人樂爲用賊黨謀再舉憚霖不敢發四年恭城陷賊灌陽霖率興安團屯邊隘賊不得逞相持數月樂平賊自別道來援霖與

方第議增丁壯移營前進過其鋒十一月次茗田賊以大隊從大風坳出犯霖壘所部祇五百人續調者未至霖麾衆迎擊奮鬪竟日力竭戰死方第賢其兄子二人並歿於陣賊再入興安焚霖廬舍盡殺其家人霖父挈孫走臨桂得免事平興安民思其功建祠祀之

蹇諤字一士貴州遵義人道光二十六年舉人咸豐三年大挑得教職明年諤還自京適桐梓教匪楊龍喜作亂長驅出婁山關逼遵義知府朱右曾要擊敗還賊遂以八月十六日圍城營郭外雷台山是時黔中治平久民老死不見兵革初遭寇亂衆洶洶欲潰獨諤力言賊可擊於是人心稍定久之官兵漸集而賊亦日附諤謁提督趙萬春布政使炳綱於螺堰陳利害請由石盤扼賊糧拊其背自領兵練四百人營馬家河復募二百人益之屢戰皆捷賊酋李七王者尤獷悍以千餘人入貴陽大道踞龍坪水口寺諤率所部圍攻盡殲之七王自焚死賊氣奪十二月官兵破東路櫻桃了賊憑險拒戰不即克諤以兵從中坪線其後大破之乘勝進克羊耳了賊退屯金錢山引渠灌田計死守諤令健

卒負草涉凍薄而焚之於是官兵攻雷嶺益急蜀兵亦進復桐梓龍喜蹙遂焚巢夜遁五年冬龍喜餘黨鄒長保再叛圍桐梓七晝夜並據婁山關以逼遵接誘復集兵練千餘名攻奪婁山解其圍期必滅賊屢深入至寺岡寺岡賊巢所在危峰攢刺往往雲霧不見天日誘勒兵直上以身先之猝遇伏前鋒爲所敗誘親率卒二十人搏戰賊衆騰至矢石交下誘力竭死之隨行之王世洪曾名標亦奮鬪死時咸豐四年十一月十日也郵道銜給世職立專祠

趙國澍貴州貴陽人豐咸三年黔中土匪起國澍方爲諸生居青巖其地扼定番廣順之衝爲貴陽屏蔽乃散家財倡團練城青巖自守隨官軍四出勦賊十年粵酋石達開竄貴州陷廣順圍定番衆號二十萬貴州大震國澍倡勇敢救定番民壯從者數百人力戰城下竟日賊斷其歸路死亡略盡國澍匹馬突圍還青巖登陴堅守賊亦卻退會賊以廣順之衆益定番之圍道出青巖脅降不可圍三日引去七月定番陷並力攻青巖國澍隨機應禦賊攻六月終不能下伺賊稍懈乞援提督田興恕與恕遣姪麒麟來大爲民擾國澍斬麒麟以徇興

恕親赴之前鋒失利責戰益急國澍策賊食將盡請斂軍堅壘障省城撤清鎮安平大定清野以待貸土匪陳文禮等死密道入賊縱火內外夾擊毀賊營二賊每夜自驚國澍以計間其悍酋使相屠遂大闕因與興恕合兵乘之賊崩潰追奔至安平復大破之定廣諸城皆復先是國澍剿平定廣土匪葛老巖楊隆喜及平代擺金平越變安諸賊收復修文等城累擢至候選同知直隸州知州戴花翎至是興恕上其功言國澍毀家築城練團當巨寇受攻半載卒創賊全省會非優獎不足以勸士民命以道員即選並總辦貴州團練事務十一年九月安順種苗匪警國澍率黔勇七百會總兵羅孝連剿之十月至安順種苗蔓延鎮永二州負險累年其老巢曰養馬寨烏束隴蜜蜂屯猛董山孝連直擣烏束隴國澍調團練分塞要隘斷賊援養馬寨賊懼縛酋獻地降國澍乘勝攻蜂窠屯十一月破水西莊阿打洞屯賊詐乞撫國澍佯納之使兵冒賊衣裝夜入蜜蜂屯遂克其巢羣賊蟻居猛董復會諸軍圍而殲之同治元年正月石頭寨等隘以次蕩平安順肅清加按察使銜會楊巖保兵潰上大坪苗夷植匪踵敗

兵渡清水江國澍聞警馳赴郎岱擊苗匪破之連戰皆捷進剿水城賊散踞洞
塞地皆險奧國澍分兵雕剿自夏經冬破洞塞百餘賊走渡江遂沿江設守乃
還省請增兵協餉以備深入苗疆而御史華祝三湖南巡撫毛鴻賓劾田興恕
苛斂並及國澍殘刻狀貴撫韓超爲覆奏辨甚晰事乃寢會開州知州戴鹿芝
殺天主教士法使愬於朝復連國澍蓋興恕嘗欲逐教民而國澍左右遂背國
澍有毀教堂殺教民事兩廣總督勞崇光與法使議令國澍償金厚葬事已平
矣開州案起并發前事法使愬不已朝廷命將軍崇實等視其獄二年三月礮
國澍職遂撤團練局苗事益急四月大吏檄國澍督練勇渡泡江河時沿江諸
軍飢潰賊再內犯竄光沙勢張甚國澍兼程進次百宜賊衆兵寡遂被圍食盡
援絕力戰死傷過半親軍數十人擁國澍潰圍出走至徐家堰賊大至奮鬪死
之巡撫張亮基以聞贈太常寺卿賞騎都尉世職子四次以炯光緒十二年進
士第一翰林院修撰

宋華嵩四川邛州人咸豐九年滇匪竄四川華嵩自備軍糈以武監生倡辦團

練保衛鄉里十年川匪藍大順圍華州城嵩率團勇大破於五道碑圍解嗣防堵夾門關青草坡大進埠等處凡自賊營逃出難民資遣無算藍逆撲蒲江華嵩督團迎擊屢勝之賊竄去十一年藍逆由新津回竄華嵩禦之文華山南河岸賊不得還折入眉州既而藍逆別股復竄蒲江踞青水溪華嵩率團進剿多斬獲卒因衆寡不敵歿於陣華嵩團練數年捐銀米數甚鉅輕財好義能得人心故所部練勇如王德明王富舉王富義楊鎮川等咸效死不顧同治元年總督駱秉章上華嵩死狀卹如例於本籍建專祠

伯錫爾哈密回王也其受封始祖曰額貝都拉畏兀兒種人康熙中獻玉門瓜州地立爲一等札薩克再傳曰額敏晉封貝子傳玉素卜晉封貝勒加郡王銜三傳至伯錫爾於道光十二年進封郡王同治三年以助開渠功加親王銜署理哈密幫辦大臣會南北路各城叛回煽變八月二十九日哈密漢裝回匪馬兆強馬環等焚掠附城村莊伯錫爾及辦事大臣文祺率回丁出戰斬兆強環餘黨潰敘功賞用黃纁九月初二日圖古里克回匪馬添才戕稅局吏役及淡

民七十餘家南攻沁城伯錫爾令章京巴海守備趙英傑追捕至北山板房溝斬添才四年二月患隴右道梗奏稱由肅州東歷蒙古漠南地至山西歸化城往還可百日請由此轉饟然台站舊在漠北蒙古力疲不能增設時哈密協標兵僅五百餘人安西協援兵二百人不足分守繼回及漢民雖衆未習戰陣吐魯番叛回類來誘人情煽動五月回匪黑老哇纏匪蘇布格等反辦事大臣札克當阿中彈死賊毀漢城入回城幽伯錫爾五年六月巴里坤總兵何瑄令遊擊凌祥趨救攻拔回城賊遁吐魯番伯錫爾奏留凌祥爲副將旋以叛黨蔓延奏山烏里雅蘇台將軍檄召明安郡王蒙兵合巴里坤哈密諸兵共攻吐魯番又數遣使至肅州請提督成祿出塞皆不果十一月蘇布格率南北各城叛回五千人復來侵凌祥以民勇三千伯克夏斯勒以纏回五千人出禦覆沒於柳樹泉凌祥遁或謂伯錫爾蓋行乎伯錫爾歎曰吾世受天子恩備藩於此臨難何可苟免收殘卒二千復戰於頭堡又大敗被執明年正月罵賊死詔贈親王

清史稿

列傳

忠義八

姚懷祥

金華 舒城 受等

章逢甲

長壽等

麥廷章

劉大北等

章印福

懷金玉等

龍汝元

龍壽 趙雲等

文豐

殷明恆

高慶雲等

高善繼

新武等

林永升

陳金授等

黃祖蓮

編山等

李大本

于光新等

姚懷祥福建侯官人嘉慶二十三年舉人道光十五年挑知縣發浙江權象山龍游等縣二十年英吉利以欽差大臣林則徐在兩廣堅持鴉片之禁糧兵甯波洋面破定海旋退出二十一年二月攻虎門廣東水師提督關天培湖南提督祥福七月攻廈門總兵江繼芸游擊凌志八月復攻定海總兵王錫朋鄭國鴻葛雲飛九月攻鎮海兩江總督裕謙狼山鎮總兵謝朝恩二十二年三月攻

慈溪副將朱貴與子昭南五月攻吳淞江南提督陳化成均先後殉難自有傳
懷祥於二十年適署定海象分募鄉勇爲死守計總兵張朝發撤之城陷南門
懷祥負傷立城上呼兵無應者憤甚投成仁塘死典史全福使酒仗氣敵至衣
冠坐獄門囚跳歎曰失城當死況失囚耶敵入署大呼殺賊斃黑酋者一輩刺
死翌年再犯甯波定海則石浦同知舒恭受游擊張玉衡外委武英太同死難
都司李躍淵則隨總兵鄭國鴻戰曉峯嶺六晝夜與把總胡大純洪武琮外委
金釗同沒於陣是役也慈溪大寶山死者爲即用知縣顏履敬參將黃泰守備
田錫陳芝蘭徐宦哈克里千總阿本穰魏啟明把總林懷玉盧炳邱法德外委
張化鵬馬龍圖何海毛玉貴王保元楊福增死鎮海城者爲縣丞李向陽戰金
雞山死者爲都司孫汝鵬守備李雲龍王萬龍千總陳慶三陳守澍周萬治把
總馬金龍汪宗斌解天培金繼外委林廣吳定江死招寶山者爲外委蔡步高
而山陰練勇袁樂忠以從問道導朱貴軍至長橋迎戰爲礮火所逼從煙焰中
躍起投海死

韋逢甲山東齊河人道光十六年進士用知縣發浙江累權宣平餘杭浦江等縣英吉利既再擾寧波洋而將寇吳淞先以戈船三十艘進攻乍浦時逢甲以督鑄大礮由鎮海赴乍浦設防就權同知四月敵遽由東光山上陸屯兵皆潰逢甲帶鄉團禦於西行汎死之同死者爲駐防副都統長喜前鋒協領英登佈佐領隆福防禦貴順額特赫前鋒校佛印驍騎校伊勒哈春根順該杭阿及調浙助防之守備張淮泗千總李廷貴把總王榮馬致榮孫登霄外委馬成功朱朝貴而伊勒哈春尤慘伏觀山射夷殪甚衆被執磔死子仁厚襲職殉粵寇麥廷章廣東鶴山人道光十二年以外委隨勦連州獠匪功屢遷至游擊林則徐查辦英吉利躉船鴉片檄廷章率舟師駐九龍山巡防英曾遞書辯論開導不服遽開礮廷章以大礮應之毀雙桅敵船又潛約土密兵船助攻復擊卻之英人既陷浙定海遂溯大洋至天津乞和朝命直隸總督琦善馳粵與議海防遽懈二十年十二月敵乘不備突進占大角沙角廷章時佐提督關天培防守靖遠礮台明年二月敵船擁入三門口斷防禦檣練南風作復以大隊圍橫檔

永安被我軍援道進犯虎門廷章奮勇禦之力竭死時同死者爲香山協副將劉大忠游擊沈占楹守備洪達科等參將周枋則以拒敵烏涌戰歿三月英人復由粵擾閩攻廈門犯內港守備王世俊蔣錫恩千總張然迎擊之均以力戰陣亡

韋印福江蘇上元人由行伍隨勦滑縣匪有膽略嘗曰武官臨陣死生度外事畏死不作武官矣累擢千總爲兩江總督陶澍所賞擢署金山管游擊英吉利之窺吳淞也提督陳化成守西礮台誓死戰以印福忠勇隸左右二十二年五月敵艦叢擊之化成被傷印福救護不及歿於陣化成之歿從殉者八十人其尤烈者千總錢金玉臨危或勸避去答曰金玉年十六卽食國饟今焉避遂及難外委徐太華善用礮轉移如志擊皆命中被擊死把總許攀桂擁護化成謂主將與某等同甘苦公報國在今日某等報公亦在今日衆心益固卒歿劍死把總龔增齡迎戰刃數人敵人圍而禽之釘手足於板櫓諸海外委周林率帳下巷戰中鎗先化成死時督師兩江總督牛鑑以礮燬演武廳亟退去之蘇州

又之江甯敵遂由寶山徇上海道以下官皆通典史劉慶恩投浦江死內河不能深入艦隊乃由福山口犯鎮江京口副都統海齡戰不勝自縊死尋諡昭節赴援游擊羅必魁把總趙連璧均死之駐防員弁同與難者爲馬甲長松與子驍騎校祥雲佐領景星愛星布恆明防禦恒山尙德恒福吉成驍騎校伊克濟訥文舉人噶喇武舉人哈達海筆帖式哈豐阿恩喜前鋒校松寶文魁阿勒金圖喜興等迫江甯欽差大臣耆英等奏定款局而五口通商之約成

龍汝元順天宛平人由行伍隨勦廣西會匪以功累擢游擊隸河南巡撫英桂軍營咸豐八年英吉利糾合法郎西米利堅兩國藉口換約俄羅斯復陰助之堅請在京帥開議議未定艦隊集天津海口朝命科爾沁親王僧格林沁辦理海防汝元奉檄至擢大沽協副將九年五月英法兵船駛入內河汝元手然巨礮沈其船旋中礮歿於陣諡武愨提督史榮椿同死自有傳是役也諸國受創甚十年夏艦隊復集天津古北口提督樂善奉命駐兵大沽至則以關防交僧格林沁令所部願留者聽得千餘人誓死守六月敵兵自北塘登岸七月一日

白石縫礮臺擊敗之相持一日無後援火藥局火起兵多傷死樂善知不可守遂投河死從死者副將守備各一失其名樂善諡威威殺時副將魁霖在通州巡防檄至天津助戰亡於陣設威肅委翼長阿克東阿侍衛扎精阿同死之八月敵遂北犯通州圖佔西倉監督覺羅貴倫與同官玉潤衣冠對縊殉節焚淀園文豐外員外郎秦清苑丞秦衷全家自焚死時文宗駐蹕熱河命恭親王奕訢再議欵局而難始定

文豐董氏內務府漢軍正黃旗人內務府筆帖式歷堂主事員外郎造辦處郎中充杭州織造授驍騎參領道光二十一年充粵海監督二十三年借兩廣總督耆英等遵議英吉利五口通商章程十五條下部議行二十六年三月授熱河副總管充蘇州織造差還授堂郎中咸豐四年賞總管內務府大臣銜歷正藍旗漢軍副都統正藍旗護軍統領七年二月授總管內務府大臣尋署正黃旗護軍統領八年五月管理圓明園事務調正紅旗滿洲副都統充崇文門副監督又調正白旗滿洲副都統署御藥房太醫院事務十年八月命在圓明園

照料一切事宜是月英人闖入圓明園文豐投水殉難賜卹如例贈太子少保銜入祀京師昭忠祠同治元年追念忠節諸臣以文豐從容赴難不愧完人褒之加恩予諡忠毅

殷明恆江西南昌人由武童投効水師營擢把總光緒四年赴閩隸平海中營師船司礮時佛郎西既併越南將窺滇省其酋領軍艦十四艘先犯福州圖覆船政局十年七月在馬江發難明恆陣亡時燬兵船七商船二及艇哨各船俱燼死者不可計見奏報者以參將高騰雲死最慘五品軍功陳英戰最烈船廠學生帶揚武艦葉琛帶建勝艦林森林均登瞭臺發礮受彈猶屹立指揮充福星輪三副王漣受礮傷猶槍斃敵兵多名均以傷重陣亡是役也戰鎮南關外隸記名提督劉永福部下者爲武監生楊萼恩哨弁何承文等隸署提督蘇元春部下者爲總兵孫得勝副將黃政德邱福初陳義新劉德勝張大壽劉玉貴參將胡延慶王紹斌蕭有明黃世昌石啓官張興寬游擊蕭寶臣李純五吳少懷都司黃均任有錫李逢植吳述元周同芳守備黃効忠楊承祿千總蘇全璧

蔣全昌李得勝把總王有興李明德楊春林徐國慶葉亞吉梁玉輝外委曹正亮六品軍功勞國豐從九品黃汝霖等隸廣西巡撫潘鼎新部下紙作社之役爲副將蘇玉標都司陳福隆把總張元鴻顧玉芳諒山之役爲提督劉思河都司劉映谷黃正寅鄧晏林杜光洧守備羅雲高千總俞諫臣蔡得勝係其易把總謝世和六品軍功萬國發等隸福建布政使王德榜部下戰豐谷等處爲總兵黃喜光副將胡陽春武鴻來參將左廷秀譚家璐王得永蔡玉堂黃祖富左占元游擊陶得玉茹章壽王德才柳臣玖都司王天喜陳永發趙步雲譚連勝胡克勝田玉貴守備邱正亮鄧青雲千總謝廷蘭張玉魁楊大德胡士英把總蕭恩清王成吉外委劉雲漢謝薛昌六品軍功黎占元唐復興譚以明等隸福建巡撫劉銘傳部下者爲總兵曾照禮副將劉義高千總殷有升把總尤運農祁文等均分別上聞贈卹有差高州鎮總兵楊玉科則以宿將有功戰歿諒山自有傳

高善繼字次浦江西彭澤人由附生舉同治元年孝廉方正朝考用教職署弋

陽縣訓導舉優行皆寒畯士積弊爲清尋調贛州府學教授又調南安光緒十四年舉鄉薦會試不第謁李鴻章於天津鴻章其父執也語不合投通永鎮總兵吳育仁幕下二十年日本侵朝鮮廷議主戰六月善繼佐營官駱佩德乘英國高陞輪船運送軍實駛至牙山口外日本舉旗招撫善繼不肯屈管駕英人先逸去善繼忿極令懸紅旗示戰備且進游之方與佩德指揮禦敵忽船中魚雷逾時水勢注射益洶湧衆強善繼及佩德亟下善繼奮然曰吾輩自請殺敵而臨難即避縱歸何面目見人且吾世受國恩今日之事一死而已佩德曰如此吾豈忍獨生高陞船遂沈善繼溺死佩德從之時護行者爲濟遠艦亦爲敵船在豐島襲擊大副都司沈壽昌堅守礮位竭力還攻及中礮陣亡則守備柯建章繼之復陣亡則黃承勳繼之與軍功王錫三管旗劉鵬同與於難爭趨死地誓不顧身尤爲當時所稱廣乙快船管輪把總何汝賓亦於是役中彈陣亡林永升福建侯官人入船政學堂肄業駕駛派兵輪練習周歷南北洋險要以千總留閩充船政學堂教習復出洋留學歸晉守備調直隸從平朝鮮之亂擢

都司赴德國接收代造經遠快船保升游擊光緒十五年北洋海軍新設左翼左營副將以永升署理辦海軍出力升用總兵二十年八月朝命海軍護送陸軍赴大東溝登岸援朝鮮日本海軍來襲我鐵艦十當敵艦十有二副將鄧世昌管帶致遠都司陳金揆副之參將黃建勳管帶超勇參將林履中管帶揚威經遠則永升主之永升夙與世昌等以忠義相激厲既合諸艦衝鋒轟擊沈日艦三卒以敵軍船快礮快爲所勝世昌戰歿提督丁汝昌坐定遠督船畏葸不知所爲又被傷總兵劉步蟾代之船陳失列有跳而免者永升仍指揮艦勇冒死與戰驟中敵彈腦裂死是役也血戰踰三時爲各國海戰所僅見永升而外金揆建勳履中及守備楊建洛徐希顏千總池兆濱蔡馥把總孫景仁史壽箴王宗墀張炳福易文經王蘭芬外委郭耀忠五品軍功張金盛六品軍功王錫山均死之世昌自有傳

李大本安徽六安州人咸豐間投効江西軍營以功累擢游擊復投効直隸充哨長曾副將光緒二十年日本犯朝鮮葉志超統軍往援扼守公州聶士成率

五營駐成歡驛敵軍來襲大本與游擊王天培王國祐同亡於陣時武備學生于光炘周憲章李國華辛得林並赴健士伏要隘狙擊敵前鋒以接應不至皆死焉士成旋繞渡大同江至平壤與諸軍合軍無鬪志潰退相繼獨左寶貴扼險惡戰死最烈自有傳自是朝鮮無我駐軍敵遂內犯

黃祖蓮安徽懷遠人少有志節嘗思立功異域光緒初入上海廣方言館列優等送美國游學調天津水師駕駛學堂旋派赴威遠兵輪練習敍千總署海軍中軍左營守備充濟遠駕駛二副海軍出力以都司升用中日釁啟說了汝昌以嚴兵扼守海口而以兵艦往擣之攻其不備否則載勁旅抵朝鮮東偏釜山鎮等處深溝高壘絕其歸路分兵徇朝鮮諸郡邑彼進則迎擊彼退則尾追又出偏師撓之彼糧盡援竭人無鬪志必土崩瓦解此俄羅斯破法蘭西之計也汝昌不從及大東溝將戰又說以海戰宜乘上風兵法貴爭先著今西北風利宜乘其兵輪未集急擊不可失汝昌復不決遂失利十二月日人乘西路南擾山東祖蓮佐總兵劉步蟾等守威海時官軍集關外東路兵單日軍由落風港

登陸攻陷榮成全力萃威海祖蓮揮將士開礮擊敵少卻既復大集諸軍皆潰二十一年正月道員戴宗騫以力盡援絕投海越數日祖蓮與劉步蟾及總兵張文宣楊用霖等俱死之時汝昌書降於敵且要敵軍不得殘餘軍仰藥死後以死綏上聞旨不予卹或謂汝昌實爲所部脅降憤而自盡降書則死後出洋弁手也時旅順先陷海軍掃地黃海諸要隘皆失守將士多死事以奏報有缺不得書其見奏報者三等侍衛永山在鳳凰城戰歿游擊李世鴻副將李仁黨與提督楊壽山分守蓋平禦敵大將乃木軍戰最烈同時以力盡陣亡步蟾宗騫自有傳

清史稿

列傳

忠義九

宗室奕功

禮部侍郎等 受恩例

松林文節等

崇壽

禮部侍郎等 受恩例 官至

宋春華

馬福祿

楊福同

吳德瀟 子仲

成肇燮

宗室奕功歷官奉宸苑卿至御前侍衛光緒二十六年拳匪肇禍各國聯軍破
京都德宗奉孝欽顯皇后西狩奕功以世受國恩未能隨扈引火自焚妻祥佳
氏子載捷等闖家投井殉節先後被難者宗室有奉恩將軍札隆阿子模誠等
奉恩將軍緝御子培善孫存德存厚等文學人恩煦子繼勳懋勳從子啟勳世
勳等掌江西道監察御史德藩戶部員外郎恩罕戶部主事謹善宗人府經歷
訥欽頭等侍衛德潤帶隊官鈺璋及奕鑫載袍恕誠聯德恩溥松達善章國文

松根景璋承惠和桂鳳喜吉辰海明覺羅有清廉年瑞德潤榮綿

松林巴雅爾氏滿洲鑲黃旗人由筆帖式累擢給事中出知臨安府升雲南糧儲道晉山東按察使布政使內擢順天府府尹病解任起爲內閣侍讀學士聯軍犯京師分守東直門親指揮礮火中抵禦甚力俄中礮死屍不可辨時陣亡者前敵有世管佐領文炳騎都尉玉蔭奎齡筆帖式寶善前鋒校榮春護軍校玉連驍騎校鍾安德昌前鋒舒元明順護軍秀亮雙祿瑞陞文福成福恩啟常貴成秀把總文通隊官全成隊長全興領催崇寬貴斌崇歡慶祥廣陞奎秀永順暇安恩慶廣立馬甲成恆瑞喜慶山倭克金布世昌玉興恩隆德勝祥瑞廣音布董連元保麟裕安長泉保玲王永立保祥李景瑞田應時張桂祥李永福清華吉順全立德玉崇喜保林長玉布克坦全保喜壽海寬延祿玉山成昌長福松齡柯永文斌徐培田文達慶連興瑞李燁保慶清海長春恩常保順廣禧廣海崇福風齡成榮雙全玉岑汪恆吉發育兵明祿玉海玉存景立關喜慶祿色勒連貴雙壽文奎奎茂齊德森明保永順泳全常來吉祿萬善立得長桂松

樑德成長安開散全興松澤德祿連陞保盛阿玉慶德祿廣成連山倭克金泰
立海德緒富森廣海崇福榮義國安祥桂富順延茂德全恩隆楊德福槍甲吉
慶連魁李長昇景英文海槍兵崇昆礮甲吉安文弼景瑞張啟茂劉龍富琪全
奎全保德鳳增銳增輝周奎斌練兵桂普隊兵光輝林慶東直門有護軍參領
賢普世管佐領德續公中佐領松鶴錫昌連秀筆帖式榮山驍騎校惠斌倭什
洪額瀛緒連桂常浩銘綸鳳啟護軍瑞斌常福春安普惠德謙恒有兆芳隨善
同廣崇敬恆斌桂祿三多隊官英璞惠斌領催德緒常慶成山富順常全雙印
文森松炳雙奎廣義馬甲喬齡錫瑞田德貴奎秀廣喜寶庚廣祿富通明喜廣
林文印德林永山錫連榮和永需長安李忠春元得林興順福貞文芳文普玉
芳烏雲珠達崇阿德貴明安世達黃培長貴普英王錫祿文華德本春倫成祐
崇慶雙奎雙海立福德保潤秀奎秀順立志亨志隆銘榮崇喜恩順連敬養育
兵慶林雙祿隆福宜緒濟堃長奎德文長清得隆景立得保明增成林福祥寶
瑞恩佑開散榮喜崇儀順福吉昆長山英振阿炳阿均廣成連山世瑞承英錫

保雙興德玉治得和森廣立李斌世山永利長齡鐵壽定坤龍泰鳳林鳳祥景
珍崇錫存德延齡錫光寶忠得虎奎福礮兵恆安國安承萬吉恒玉森善溥盛
謙隊兵浚貴伊立布崇文門有護軍校富亮驍騎校德瑞筆帖式潤普七品官
薩斌圖監生福壽隊官彤勳護軍慶陞定昆世喜富山領催玉山連英國棟文
通馬甲志福鐵升桂安清海巨泰烏林興海聚泰玉保成喜恩沾全順恩保輔
廷達英張仲蘭養育兵永祿文斌隆興德存富寬常壽全祿海玉英盤松山連
陞存德開散文成文亮崇林松山常林秀斌松玉忠福巴克坦布奎榮崇海緒
順德清槍兵文海隊兵恩保德祿隆興幼丁劉長立朝陽門有雲騎尉富珠倫
恩騎尉連福護軍校富亮驍騎校續魁烏槍藍翎長松春護軍海秀常福烏林
泰萬玉斌前鋒吉昌領催常興保昌馬甲永安福山雙喜保勳德福鐵陞興海
長瑞玉安巴楊阿烏林保養育兵貴全凌山恩啟保春湧激德順裕泰玉厚成
玉趙文忠閏福文瑞榮德開散長緒文立多太誠堃恒立常興伊三布文祿常
林瑞申恩錫連陞松山厚寬張勳松山忠福東便門有游擊韓萬鍾弟韓萬祿

千總慶餘把總金鈺戰兵王壽李永福馬兵梁坤張德與德勝門有副參領祥
存世管佐領承瑞驍騎校崇桂領催柏銘容剛文惠馬甲錫連桂啓養育兵常
海隊兵榮喜安定門有筆帖式增俊馬甲立貴長慶德閩盧檢貴恩壽德平長
存松祿趙俊雙恆山莊立玉明劉殿臣長壽榮桂合海袁明林揚有春文愈文
茂文毓連順施彬文福王玉鳳線長海全英煜祥鍾銘傅合連陞馬玉和養育
兵恩緒奎元二立文浩開散清聯德謙武生長緒齊化門有護軍校連瑞西直
門有養育兵烏什哈開散全桂阜成門有敖爾布鍾珊永定門有開散長泰玉
泰春祥正陽門有開散清林奎連德勝宣武門有礮甲林廣明藍翎長祥瑞領
催常連景緒馬甲榮福崇善德斌全順定保榮慶維明礮手慶煥養育兵松長
閑散英緒續順崇海大清門有前鋒玉興天安門有護軍參領玉山副護軍參
領雙福護軍枝花連布侍衛潤志前鋒歧俊護軍永壽文瑞瑞陞承通林安玉
慶春喜祥林松桂永壽文祿常陞常海松惠海全桂陞雙壽午門有副護軍參
領鳳齡前鋒崇祥桂豐護軍玉壽德凱東安門有公中佐領松壽步軍校文通

領催延壽東華門有副護軍參領長年副令官英寬藍翎長富陞隊官玉昌護
軍恩秀奎英成光忠明貴慶崑連松羣玉山阿杭阿玉壽恩秀奎俊成英文廣
托克托虎常山廣慶希拉布他克布連德馬甲長山養育兵存山閑散德元技
勇兵全貴西安門有養育兵永順德福西華門有馬甲春明地安門有神虎營
管總崑明副護軍參領恒謙護軍管管理祥瑞護軍隊官凌魁隊長彥祿護軍
常瑞薩圖布永安常山雙壽興斌馬甲文海福山養育兵崇恩全苓順喜閑散
德祥紫禁城內有護軍參領海忠親軍校文玉守陣者有世管佐領德潤馬甲
錫秀巷戰者有驍騎校多倫布藍翎長德英額雙貴前鋒鳳玉希拉奔崇安文
英榮昆護軍德玉崇貴崇福崇興領催鶴鳴馬甲雙福長海慶裕桂保長陞恩
立興岱存桂常泰養育兵英厚文志德成俊成幼丁元成全祥世增烏凌阿廣
林廣俊松蔭松祺松立延尉成明廣瑞閑散全順額需多山慶祿外委王文志
聞廷標王灝高玉常存百總郭立奎管隊張海金松林把總王洪銘馬兵彭玉
恩金祥戰兵李逢春戴永福彭玉堂孟祿守兵王政樞劉永安季茂軒礮甲祥

通敵手白萬泰死事者甯壽官員外郎誠年筆帖式福臻在內值宿七月二十一日已刻聞兩宮西狩即赴各殿封鎖至欽禧門外值房投井死太廟五品官富亮值班上香洋兵突進拒之槍死織工張繼福在綺華館被戕左營參將王長蔭守署不去以獨力難持投井死護軍連陞值班端門護軍崇連神機營呈遞公事步軍校廣音布常福勝喜領催雙喜馬甲存林恩明外委孫國瑞技勇兵常有隆祥萬昭均在廳值瑞領催榮鈴養育兵定成隊兵布興泰均看守軍庫南城正指揮項同壽在署辦公戶部書吏高世祥總理衙門供事沈鵬儀徐伯興洪瑞汝均在署值班與於難在先陣亡者把總李鍾山外委李鍾林七月十七日在張家灣禦敵不克死先後被難者游擊王燮五月二十五日在東便門彈壓拳匪被戕並燬其屍采育營部司楊光第於閏八月二十九日聞洋兵至衣冠坐營中被槍死把總張進志擁護同死均經留京辦事大臣崑岡上聞贈卹有差

崇壽溫徹亨氏滿洲鎮黃旗人光緒十六年進士入翰林累擢翰林院侍讀燮

作時不勝憂憤仰藥死詔以見危授命褒之諡文貞韓紹徽字筱珊貴州貴陽人光緒二十年進士授主事分刑部勤於所職拳亂初起嘗走同官涕泣誓身殉七月二十一日自經於陝西司司堂掌江西道御史韓培森巡城積勞城破絕食死內閣中書堃厚手書見危授命四字與妻同縊死馬鍾祺字維春隸漢軍鑲黃旗少爲諸生以雙一等子例不得與試授三等侍衛擢二等有文武才初服膺陸王之學繼參以程朱張呂不主一家爲人伉爽有奇氣慕孫白谷之爲人好與朝野賢士游與語或不合輒哦詩亂之以此得狂名光緒二十年日本爭朝鮮廷議出師鍾祺上書請自效遂從戎奉天盛京將軍依克唐阿器之使統領邊馬隊會和議定遂歸二十五年李秉衡奉旨巡視長江親訪於家疏請從行拳匪禍作冒鋒火而北秉衡殉難鍾祺護其喪歸歸三日京師破鍾祺自縊死著五倫大義馬氏日記若干卷候選縣丞董瀚於城破日與弟候補巡檢徵曰我等職雖微未既讀聖賢書惟有以身殉國而已同時自縊涿州附生譚昌祺聞城陷懷樂哭諸聖廟仰藥死舉人莊禮本留京讀書拳匪初起即以

爲憂洋兵入城痛哭不食後以一慟而絕州同銜馮福瞻在通州署辦刑名事七月十六日敵入署守護案牘不屈被戕東城司吏目練勇局委員宮玉森洋兵攻局其女請避怒投其女於井拔刀出戰傷數處自知不免亦投井死時同被難者爲原品休致禮部侍郎景善前奉天府尹福裕蒙古副都統耆齡前察哈爾副都統明秀冠軍使文珠工科給事中恩順刑部郎中汪以莊兵部員外郎薩德賀趙寶書吏部主事鍾傑戶部主事陶見曾李慕鐵山刑部主事毛煥樞王者馨工部主事白慶恒昌理藩院主事英順光祿寺署丞多文國子監助教柏山候選道鄭錫敞前紹興府知府繼恩分省知縣王朝鑽等見冊報者千餘人全家焚溺服毒自經以盡節者衆騎都尉候選員外郎陳鑾住東便門二間於七月十九日洋人攻城勢急與諸弟率眷屬僕婢三十二名一時自盡尤爲慘烈云

宋春華字實菴陝西三原人光緒十二年武進士授藍翎侍衛出爲天津鎮標右營守備與士卒共甘苦所部爲天津綠營冠驍軍內犯總督裕祿檄春華守

城南門城東南製造軍械所不守春華集其衆曰軍械所存亡天津生死繫之不奪歸不可膽勇者盍隨吾出城皆應曰諾率百餘人夜半潛出及庫垣春華先登衆隨之鎗中春華左股衆欲退春華負創大呼曰今夕之事有進無退衆爭奮敵死傷甚衆卒以守堅退歸城已而敵兵日集守士官多棄城走春華慨語其妻陳曰城孤兵單終恐不守汝當以吾子出求生吾誓與城存亡矣語畢登陴督戰不少息城既陷身被數傷猶死守不退或勸少避春華曰城不守死自吾分汝曹各有父母妻子歸可也俱死無益衆感其義無退者敵畢登城乃仰天歎曰吾志不遂負國恩矣然自接戰以來殺敵過當今日之死亦無所恨以首觸陴腦出死年三十五

馬福祿字壽三甘肅河州人光緒六年武進士用衛守備歸河南鎮標以終養告歸二十年循化撒拉回族以爭教叛固原提督雷正綰檄福祿往崔家峽樊家峽協防戰輒勝河湟回匪繼起復助官兵獲大捷累功至記名總兵二十一年河州諸回變福祿本回教回以福祿助官軍欲加害福祿在城人亦以回教

爲疑獨正綰信之時河州鎮總兵湯彥和遠駐起乍堡命福祿率騎兵迎入河州城鎮之彥和猶豫不果行叛回周七十乃糾衆據山巔下擊福祿戰二日以失地利無功彥和復潛走軍無統帥賊益躐之福祿乃突圍出南番境至蘭州乞師沿路拔出難民數千難民德之狀總督楊昌濬昌濬以福祿孚衆望乃檄與蘭州道黃雲山北路援河州時喀什噶爾提督董福祥奉旨赴甘肅協勦由狄道進兵福祿率師至蓮花渡與賊隔岸相持爲福祥軍犄角卒解河州圍時韓文秀亦作亂河湟提督李培榮總兵牛師韓軍失利陝西巡撫魏光燾與福祥會白塔寺議進兵福祿入謁陳亂事顛末及前後戰狀福祥奇之檄勦叛回治主麻於米拉溝勦未盡馬營土豪馬采哥應之福祥部將石堯臣等告敗福祿復分道往援首先陷陣斬采哥衆而殲之治主麻收餘燼由黑山趨米拉復還兵破之斬無算用是有驍將名拳匪倡亂福祥奉旨入都檄福祿統馬步七營旗防山海關尋移永平府福祥入衛京師檄隨行五月各國聯軍躡楊村而西借漢中鎮總兵姚旺等赴黃村禦之抵郎坊兩軍相接乃令騎兵下設七覆

步兵張兩翼敵近始發槍倒者如仆牆敵彈落如雨騎兵以散處少傷兩翼左右復包抄其後短兵相接敵不支遽卻爲庚子之役第一惡戰六月福祥檄令攻使館中彈歿於陣猶子耀圖兆圖亦死同殉者百餘人

楊福同直隸清苑人同治七年投軍累擢游擊從討朝陽教匪嗣以副將駐營大名專力緝捕以功記名總兵分統練軍左翼馬隊兼統天津馬步隊各營近畿拳匪竄起涑水尤甚總督裕祿檄福同率隊往至史家莊伏匪邀擊力禦之擒數人次日又敗匪於石亭鎮擒首要梁修福同不忍多誅令限日解散留馬隊三十人鎖之無何匪以千餘衆攻留隊福同率步兵數十馳援將及石亭羣匪自溝中突出白刃交下創甚猶格殺數人力盡死之從弁孫裕清盧瑛瑤俱力戰死賜卹如例

吳德瀟字筱村四川達縣人性至孝博極羣書以進士用知縣庚子年任浙江西安北京拳亂起江山縣土匪以仇教爲名連陷江山常山縣人咸欲應之德瀟謂北事未定洋人必不宜殲有羅楠者素健訟德瀟嘗嚴懲之久含恨結都

司周之德挾衆指德滿袒洋教劫德滿縛道署轅門盡鑷鬚髮以利刃攢刺洞腹死德滿罵不絕口子仲翰馳哭尸下又殺之並入縣署殺全家四十餘口事定卹如例

成肇肇江蘇華亭人父孺諸生列儒林傳肇肇由舉人官直隸知縣遷直隸州知州署涪州靜海補靈壽所至有績光緒二十七年京師和議梗聯軍西上單及邑境責供牲畜糗糧甚厲肇肇壹弗應俄而布政使廷雍檄至令迎犒肇肇自念不迎犒無以全民命迎犒則以中國臣子助攻君父事處兩難守土之義無可避惟有一死耳迺繕遺牒遣人間道達府媵之以詩曰屈體全民命捐軀表素懷李鴻章狀死事以上謂其能伸大義降敕褒嘉贈太僕寺卿諡恭恪予世職明年允直督請建直隸省城專祠

清史稿

列傳

忠義十

劉錫祺

反榮登 祥彤

桂蔭

存厚 榮清 錫慎等

張景良

傑和布 萬城鎮

松興

松俊等

宗室德祐

彭毓嵩

楊調元

茂編 有瑛 榮明等 德俊

張毅

喜明

阿爾精額 斌傑等

譚振德

興圖斌

陳政詩

陳和劍 魯世名等

羅長琦

正曹 承第 章 吳慶以 剛 徐 昭 陶益 家 琦等

奎榮

王毓江

沈 謙 守 中 錫 麟 等 何 永 清

世增

國家 堪錫 張琦 吳軍 毛 汝 霖

陳兆棠

馮汝楨 何承齋

張振德

野志

白如鏡

張何 培 廣 黃 兆 烈

來秀

王 劉 榮 全 錫 錫 李 榮 鈞

定煊

張 瑞 巴 雅 阿 壽

王有宏

威 何 從 錫 聖 蔚 黃 景 臣

盛成

培竹 湖南 前山

桂城

金 湖南 文 文 文

高謙

黃為熊

文 海 總 翰 所

貴林

益 海 等

額特精額

文 蒙 等

玉潤

勞謙光

百 陸

張程九

王文域

鄂 風 等

張傳楮

李 羅 文 州

胡 王 慶 林 禮

更 趙 佛 某

施 傑

梁濟

簡純澤

王國維

劉錫祺字佩之直隸天津人畢業將弁學堂第八鎮成立為正參謀官光緒二十二年南北陸軍於河間會操籌度有勞加正參領銜宣統三年夏秋間革命黨人之在武漢者數被破獲總督瑞澂恣意捕殺人人危懼八月十九日武昌變作始僅工程營數十人他軍無應者瑞澂遽逃兵艦省垣無主於是各營皆起擁立都督黎元洪稱軍政府獨立錫祺時方赴沙市以二十六日回武昌各

營爭往迎謁趣入見元洪錫祺正色曰國家歲糜巨帑練兵原期君等爲國干城以禦外侮奈何一旦爲人煽惑遽爾發難乎禍機一動將無已時吾不能爲君等所爲衆聞之譁怒卽於坐中擊殺之事聞照協都統例從優賜卹發難時督隊官阮榮發出阻衆遽擊斃之榮發邑里未詳程彬字筱竹江西樂安人時署鮎魚司巡檢署在省城南十九夜見城外火起彬馳往救護至望山門外正街突遇陸軍礮隊入城皆袖纏白布彬大駭厲聲問曰汝等反耶此何爲者衆舉槍擬之彬益前致詰遂遇害以一巡檢犯難而死人皆哀而壯之

桂蔭字桐五姓嵩佳氏滿洲鎮藍旗文生由刑部郎中軍機章京外擢施南府知府調安陸以治隄盡力名安陸爲襄樊門戶府城故無兵武昌變聞圍守計并牒道請兵已而旁郡德安荊州皆陷十月初五日鄖陽兵驟變圍府署劫印信桂蔭攜妻富察氏趨入文廟夫婦同縊崇聖殿中死衣帶中書有虛生一世不能報國安民數語臨殉難時顧爲僕曰葬我必北面官紳流涕歛之葬城內陽春臺側存厚字寬甫正白旗監生由內務府郎中選宜昌府調辦襄陽樞局

三年十月郡中黨人應武昌存厚揮家人出避曰吾嗣不絕死無憾局丁旋繫存厚擁至北門校場戕之幼子被搜獲斃死榮溶字心川荊州駐防蒙古鑲藍旗人光緒三十年進士用知縣發湖北補天門縣操行不苟變作後荆防旗人有自武昌脫歸者道天門語狀且爲榮溶危榮溶以死自誓集紳耆練民團爲保衛計無何黨衆來攻遂被害記名驍騎校炳安同死僕成松亦殉焉同時殉國難者爲候補縣丞錫植姓汪氏漢軍人充沙市警察官盡室被燬解州司巡檢方祖楨安徽桐城人鄂軍頭目將入湘道解州土豪某夙銜祖楨嗾人殺之江岸石花街巡檢王萃奎江西豐城人佐穀城縣治盜有聲襄陽既變屬邑響應盜渠繫萃奎及一子一孫殺之蘄州吏目駱兆綸字文卿湖南江華人亂作知州亡去州人以綸習吏事遮留之綸請送母至漢口乃還至治所以全省皆陷事無可爲憤絕投河死又襄陽府某縣典史當變作時晨起踰扉門外過者叩頭要入得負販者十八人出銀幣二百枚分遺之曰平生所積止此城破義不得活請助我殺敵衆感其義各攜盾輿長木及負擔之具噪而出變軍方踞

府署出不意擊死者數人俄而排槍起某與十八人者皆死候補知府張曾時
字望吧江蘇無錫人以書蹟似總督張之洞爲之洞所賞充文案有年榷漢陽
車站貨捐戰事起避上海警者誣爲挾貨遁曾還漢口會計出入悉符合得還
黨人適同舟而辱之捽其冠遽投江死候補知縣聯森字植三蒙古鎮紅旗人
隸荆州駐防光緒八年舉人挑知縣發廣東改湖北屢榷釐捐能恤商九月道
出漢陽變兵爭索金慷慨大罵遇害子寶焯兄子寶明從死

張景良湖北人將弁學堂畢業生游學日本歸充湖北新軍標統武昌既擁立
都督景良慷慨說之曰朝廷已宣布立憲不宜更言革命公受知遇久諸將惟
公命是聽盍三思之變軍怒拘景良署中時清兵攻漢陽景良陽請赴前敵以
妻子爲質乃委充司令官九月初六日之戰清兵卻景良率礮隊出臨發礮子
彈一枚槍子彈一排甫戰彈密景良遽大聲促軍退衆不知所爲遂大潰死者
枕藉清兵得進屯大智門後廉其故殺景良臨刑夷然仰天大言曰某今日乃
不負大清矣倭和布字清泉滿洲正白旗人家世以武功顯獨兼肄文學起家

護軍藍翎長歷二等侍衛拳匪之變歐人僑京者多被戕倭和布護之甚至或詰之曰外人僑吾國勝之不武無故與八國構衅敗將不國吾敢重召亂乎旋扈駕西行家人初以爲戰死出爲湖北均光營參將擢施南協副將川寇陷黔江率所部赴援獲其渠斬以徇武昌變作鄂將屯宜昌者應之倭和布時以裁缺寓宜城被執勸降不應以得死爲幸遂槍殺之周飛鵬字翔千江西新建人由武舉人累官都司充湖北襄防馬隊管帶駐老河口鄂軍變縣無賴出獄囚糾水師營謀變飛鵬持不可出佩刀與鬪槍及馬腹墜馬槍繼至洞胸死裁缺荊州城守營參將王萼亦遇難死之

松興蒙古正白旗人荊州駐防以諸生改武職累官協領記名副都統充常備軍統領變兵入城被繫入鄂叱使跪曰吾朝廷大吏城不保義當死頭可斷膝不可屈士紳三十餘人馳救之已及於難其戚善吉庖人福全皆從死駐防之同時殉難者在武昌有兵備處提調松俊守楚望臺火藥庫變兵攻庫力戰死三十標隊官重光守藩庫變兵掠取庫儲重光大呼保全名譽被槍死妻趙子

春年長年寶年同日殉四十一標排長色德本三十標副軍需官寶善二十九標排長德齡隊官東良排長德培均戰死前泰甯鎮右營都司榮錦就養子書記官朗察所拔所佩劍自裁姓迎吉及朗察舉室自焚驍騎校哲森以領軍械至省自刺其腹死陸軍小學教習舉人迎禧平時於古人之當死不死者輒痛詆之變作時衣冠坐講堂及難副軍需官榮勳仰藥死子額勒登勒穆貞額殉之第八鎮執事官錦章謀召同志抵禦中途遇害父榮喜即自盡司書生恩特亨雲騎尉榮滿排長倉生光均大罵不屈死文生楚俊在督署金培榮森司書生銍壽訥爾赫圖均在省與難在荊州者聯長澤麟憤全省盡陷發槍斃數人被害協領志寬排長額哲蘇依成額關斌魁恩騎尉扎勒杭阿隊官王榮耀均亡於陣生員秋培城陷自盡防禦多瑞仰藥死記名驍騎校金霖嘗作萬言書以旗制不良力主變更人多笑之及變作發槍自擊死又知縣用模範講習所所員根壽於羊樓峒文生陸營司書生定海於施南府均死之其後死於江甯者爲生員占先文志恩昌武生林福死鎮江者爲生員榮有副將赫成額則隨

端方在資州兵變遇害軍諮府軍諮使良弼自有傳

宗室德祐字受之隸正藍旗不詳其支派宣統二年由禮部儀制司郎中選授鳳翔府知府三年九月西安兵變德祐聞警即與知縣彭毓嵩籌備有湘人劉瑞麟以武職留陝委令募團勇與參將王某分任防守初七夜匪徒假民軍名號驟集千餘人攻府城德祐與毓嵩登陴激厲士卒拒守至天明匪氣奪將引去以有內應者城遽陷左右擁德祐走避德祐曰此吾死所尙何避爲匪盡至呼曰知府滿人且宗室宜速殺之遂遇害又殺其幼子二人王參將同州人城破與匪相搏憤而自戕昇至署乃死名未詳毓嵩字鏡孫四川宜賓人由舉人官教諭學政疏薦用知縣選陝西鳳翔勤聽斷時方興小學必令讀經城陷後毓嵩解束帶自經遇救未絕乃從容出堂皇北向跪起語衆曰吾有死耳任爾等爲之匪擁至署西北神祠以白布纏其頸毓嵩怒督遂被戕梟其首去年六十有二子鉢年奔赴死所爲匪衆所逐投井死

楊調元字鉢甫貴州貴筑人光緒二年進士授戶部主事丁父憂歸服除以母

老不赴官終母喪乃入都改知縣選陝西紫陽縣於秦境爲極南居萬山中爲楚蜀會匪出沒地以緝捕有名邊長安權華陰疏洛河渠復民田五萬畝調華州以獄事忤上官解任已復補咸陽擢華州署富平渭南等縣其署渭南以宣統三年正月先是南方革命軍數起皆不得志始改計結學生之隸新軍籍者潛伏待應陝軍勢弱則又結會匪以厚其力八月十九日鄂變起九月朔陝變繼作諸守令多委印去調元獨謂守土吏當與城存亡亟召紳民議守禦渭南北有號刀客者殺人尋讐數犯法至是感調元義爭效命集者萬餘人檄邑紳武進士韓有書統之時鄰匪竄起渭南以守禦嚴不能入臨潼武生張士原揚言受軍政府命驟率衆徇城下調元登陴語之曰吏所職保民耳無如所犯則釋兵入見必怙威圖一逞則視力所極當與決生死士原知不可侮遂屏騎入廨以議貸餉事語侵調元至是躑躅廨後園中仰天歎曰吾誼應死所以委曲遷就欲脫吾民兵禍而後歸死耳詢辱至此尙可一息偷生乎遂投井死民間調元殉難執士原磔之並殺陝都督所派副統領及同黨數十人以徇有

書時出擊他盜馳歸葬調元畢家原調元通古學工詩文有訓樂堂集說文解字均譜等書所作篆書人尤寶之楊宜瀚字吟海四川成都人兄宜治官太常寺卿宜瀚好學嘗入烏魯木齊都統金順幕中治軍書知名保知縣中順天鄉試舉人以知縣發陝西補興平調寶雞以經術飾吏事與調元齊名著華州知州民軍圍署索餉以威劫入甘露寺中有以事繫獄賴宜瀚手反得出者約護宜瀚出入夜宜瀚獨至神殿自經死遺書親友意思安閒謂已得死所無可哀者陳問紳字子仲湖北安陸人入貨爲縣令發陝西權甘泉以能緝捕稱調白水邑刀匪素難治武昌變起乘間應之糾衆攻城時問紳初受任一切無備乃集紳民告之以不忍以一人故致全境糜爛遽出城大罵不屈死妻吳以護印不與同被戕并斃傭婦某德銳滿洲人官秦中久歷長安三原諸縣有循聲西安變作八旗人多被禍德銳時居會城變兵突入語德銳公得民心我曹不忍死公請速出城答曰咸汝等意然予滿人也不忍獨生刃加予頸可也遽起奪刀自刺死妻子均自裁皮潤璞湖北大冶人官榆林縣典史有強項稱變作匪

徒縛榆林鎮總兵張某中營游擊瑞某送獄潤瑛斥之羣怒以利刃相擬不爲動紛加以刃分肢體爲數段妻聞訊即以身殉榆林守備穆克精額同時死闔門自盡時殉難者候補道榮麟字仲文滿洲人變作方權白河釐金全家投井死候補知州張存善字次章惟鳳翔鹽盤死事所候補直隸州知州寶坪字子鈞西安駐防一門殉難者七人候補同知廣啓字少漁候補通判嚴濟字寬甫均滿洲人與於難

張毅字仁府直隸天津人父夢元官福建布政使護台灣巡撫以清廉著稱卒贈太子少保毅由廢生官部曹改道員分山西奏調陝西授甘涼道宣統三年六月擢安徽提法使八月自隴入秦將入覲九月抵乾州變作道梗變軍偵知之請爲參謀官斥之搜衆怒羈留不得脫會疾作州人知毅賢言於變軍乃出就醫毅念惟一死可自完十一月初十日夜加丑乘間投井死毅無官守中道逆變卒完大節世尤多之

喜明字哲臣西安駐防舉人宣統三年九月民軍猝起攻旗營將軍文瑞督戰

喜明領兵百餘人獨樹一幟誓以書生效死戰不利歸告母曰吾屬死不免母曰婦女以潔身爲重可受辱乎帥子婦二幼孫一投井死喜明有二女匿鄰廟中走入手刃之蘸血書壁曰喜哲臣三女死於此還至家縱火自焚死附生春祥素端謹聞變後語兄若弟曰城破家必亡自古全家盡節有光史册吾願死矣則皆應曰諾城陷聞礮聲近曰可矣遂偕兄弟妻子輩十餘口焚死無一免者直隸州州判阿爾精額椎釐金於方計堡受代還道咸陽變軍將劫之爲之語曰吾當未亂時志欲以忠報國敢偷活耶義之不加害乃入邸舍庸衣冠北向自刎死妻張氏即吞金以殉城破時陣亡者爲協領斌恒恩瑞存福培基佐領貴陞特克什肯慶喜巴克三圖恆秀瑞明額哲本達朗阿興智恩壽玉祥西拉本奇徹亨恩撤亨防禦存喜存陞恩成林福色清額平陞胡圖靈額惠文鶴齡奇巽蘇克敦訥拉春惠源呢克通阿哲爾精額惠祥驍騎校奎亮林啟啟弟正目林璋都倫太景文太薩立善文昭伊吉斯琿智厚惠慶惠啟副官惠璋鹽大使文煥舉人惠斌生員金常武舉人德森布騎都尉昌廣益光雲騎尉俊亮

和瑞松善特仲布富海勝春海亮多鑾太達林和順忠雲玉恒培文存祿倭什
琿鳳玉惠撤亨恩騎尉培緒鳳山恩瑞奎德貴成錫齡崇喜倭仁額殉難者爲
佐領圖切琿候補直隸州知州寶坪直隸州州同俊興候補知縣德銳自刺死
妻子同殉防禦多英與長子舉人奎成率妻女等投井死次子生員奎章伏井
慟哭從死族弟奎斌奎莊皆死之巡官惠祥率警生守城城陷投井死家屬從
死者六人從子廣興旣殉母趙氏年六十餘執短刀闖入民軍欲殺敵尋自刎
死生員音德本走多公祠自經死弟領催額哲亨城陷死傷亡者佐領圖們布
善印全瑞旗兵之死於此役有名册可稽者凡千餘人官弁兵丁之家屬遇害
及自盡者尤衆論者謂各省駐防於辛亥國變以西安死難爲最烈且最多云
譚振德字子明直隸天津人始入武備學堂調新建陸軍派充山西四十三協
協統時山西僅陸軍一協振德寬而有制兵士親之巡撫陸鍾琦履任之三月
武昌變作陝西響應召軍官議省防振德與參議官姚鴻法建議接濟河南軍
火而以重兵助守潼關鍾琦從之遂於九月初七日發新軍一二營子彈令於

翌日出蒲州屯潼關又令熊國斌帶第三營繼之有搆於一二營者謂熊營將於中途襲擊適第二營管帶姚維藩以請棉衣未得爲憾聞之憤激謀變明日擁衆入省城振德聞警不及集兵衛馳出遮道對衆有所宣諭維藩恐其撓衆心舉槍斃之遂趨撫署鍾琦父子殉難國斌以不肯附和亦被戕鍾琦自有傳陳政詩字詠笙浙江仁和人年十九從湘軍西征將軍穆圖善器之從至奉天充防營統領光緒初以知縣發山西歷署州縣以廉惠稱以勦套匪功擢知府以道員用調浙統嘉湖水陸防軍中譏能宣統元年浙撫增韞奏言政詩軍紀嚴有廉將風詔復原官再發山西三年統帶南路巡防隊駐澤州兼署澤州府武昌變作陝西響應晉新軍亦變戕巡撫時政詩駐聞喜隘口鎮遏變兵南趨敵千人脅土匪亦千人以三百人屢敗之方乘勝進擊清廷詔命停戰乃駐師絳州敵旬結旁近土匪勢復張政詩以去絳則南路即與秦軍接全晉將不保誓死守十一月二十日敵攻城城紳迎以入政詩巷戰力不支被執罵不絕口剖心鬻割死弟敷詩山西候補同知隊官陳順興劉占魁均同時被難陸敘釗

字磐芝順天大興人原籍蕭山少厲志節從軍甘肅保知縣曾國荃撫山西招入幕擢直隸州發山西歷官州縣凡十二皆有聲宰靈邱十年尤得民拳匪逼晉邊大治鄉團縣境晏然宣統初薦卓異補河東監掣同知太原變作河東戒嚴叙釗先以盛暑督濬鹽池致疾至是疾甚強起治防守事秦軍來襲晉軍應之城陷預服阿夫容膏衣冠出堂皇厲聲詆之刃交下無完膚殞於座子文治聞變以毀卒幼子亦爲變兵所戕時論謂與巡撫陸鍾琦父死忠子死孝鄉里同氏族同死難情事略同推爲奇烈時署陶林廳同知齊世名天津人崑崙州知州奎彰天鎮縣知縣世泰均京旂人先後均以兵變被戕

羅長琦字申田湖南湘鄉人光緒二十一年進士改庶吉士授編修捐升道員發江蘇改四川趙爾豐督川邊軍事長琦在幕府多贊畫宣統二年簡駐藏左參贊駐藏大臣聯豫以兵備任之會閱新調川軍以譁謐故與協統鍾穎有隙且覈鍾穎入藏軍費用浮冒汰二十餘萬鍾穎益嫉三年五月鍾穎率師征波密戰屢挫長琦馳往奪其軍得鍾穎失機狀方激厲軍士規進取而軍多會黨

氣鬱甚長崎馭將又嚴及秋內地變作軍在藏者遽變掠長崎私宅波密軍繼之繫長崎屈辱之偶得脫自投桂下未死復曳之起卒被戕長崎之死鍾穎實陰嫉之後家人懇得實寘鍾穎於法曹銘浙江上虞人由諸生參四川總督劉秉章幕保知縣歷治西藏夷務著績擢道員巴塘邊亂番衆族十餘陰爲犄角銘往解散趙爾豐軍得深入勘定功尤偉署嘉定府旋委石堤釐局局介黔楚間往者皆中飽銘絲毫不染成都變作匪衆入局露刃逼索釐款拒不應中十餘創垂絕乃委去縣紳來視以先事窩藏金指視之點驗畢遽卒章慶字勤生浙江會稽人以通法家言游蜀就幕職爲總督錫良等所器保知縣所至有聲署劍州倡捐萬金修文廟禽巨逆王文朗殲其黨九十餘人調南部河徙留城築長隄禦之城以完調冕甯縣有橋縮穀川南毀於水渡者以水駛多溺慶製鐵梁數十丈行旅稱便普支夷擾境慶廉威所被濟以兵力夷歸誠出被掠者多人補射洪擢道員在任候補其任西昌也值川省爭路事起哥匪張國旺與裁缺千總黃義庫偵知甯遠軍隊出防城中無備聯內匪襲城慶督團衆禦之

力竭死之妻顏猶子鏞及胥役僕從同死者二十餘人徐昭益字謙侯浙江烏程人咸豐季年殉難江蘇巡撫有壬從孫隨父游蜀以通法家言佐治有聲官知縣宣統三年四月攝威遠同志會起土匪附會名義乘機報怨四出剽掠匪過境昭益率團丁數百人出城解散不從匪以全力進逼昭益念母老居危城命親丁護送還省母臨行勉以大義昭義泣涕受命謂必不負母訓以辱先人聞者皆爲感動九月十三日匪薄城下奸民爲內應團丁未訓練猝戰遽潰昭益乘騎亦受創退而守城其酋七八人入廳事昭益厲聲問何不殺我其一酋突出利刃刺昭益腹死之曹彬孫字藹臣順天武清人以舉人勞績知縣發四川權奉節補開縣未赴七月省城之爭路構衅匪徒欲附同志軍起事彬孫隨方禁阻未敢逞武昌發難夔府響應十月初十日彬孫率團勇出巡行至協臺壩衆暴起團勇先受煽不戰而散彬孫被執割其首置縣公案警察長徐某失其名安慶人同時被戕汪承第字棣圃江蘇太倉州人由州學生佐學幕以知縣發四川雷遠夷亂檄運兵械至則知府黃承麟留辦剿撫事充營務處攝大

足川漢鐵路擬派租股請減萬餘金民困以紓攝永川解散公日秘密會編練保甲羣盜屏跡既受代大吏仍以營務屬之同志軍起雙流境尤囂張檄攝縣事捕誅其尤者人心少定未幾省城變作土寇四起以事至簇橋被困中槍死十月二十日也吳以剛字克潛江蘇陽湖人以知縣發四川嘗權彭縣縣銅廠通松潘茂州夷地素爲盜藪胥吏與通十餘年不獲一犯以剛乘冬至朝賀禮畢馳馬自率隊禽之未午獲著名巨盜數人歸宣統三年以父憂充重慶屬水路巡警提調武昌變作黨人謂以剛藏軍器執而戕之時候補縣丞陶家琦在重慶誣與以剛通謀並遇害候補知縣湖南文某字晉巖省城兵變亦與於難

奎榮字聚五滿洲正紅旗人成都駐防同治十三年繙譯進士用知縣發四川奎榮篤嗜程朱書務躬行性溫厚與人語惟恐傷之始權南充偶誤決一獄屈者悲而得狂疾聞之大喊曰是予之罪也亟集兩曹自引咎平反之自是聽斷益平尤留意風化在峨眉任捐俸購儒先書集書院諸生定課程親爲講授歷

健爲彭水慶符諸縣所至勸學一如在峨眉時庚子前以老告休捐居宅爲學校用鐵路爭事起總督趙爾豐持之急奎榮太息謂損下益上失民心蜀禍將自此始遂避地郊居同志軍起復遽入城十月初四日紳民迫總督交政權又訛傳北京失守遂託疾不食或謂年已篤老毋過自苦奎榮慨然曰國事如此吾輩尙偷生耶至十四日餓死年八十奎榮德望爲蜀士推重皆稱聚五先生既殉節益崇敬之

王毓江字襟山安徽宿州人父心忠官江南總兵毓江將家子有材略以知縣官江蘇復以道員改發陝西充兵備處總辦余誠格擢湘撫檄調湖南仍管兵備處事長沙變被執罵絕不口被亂兵所戕到湘纔九日同時死難者候補游擊劉駿堂湖南益陽人光緒庚子自立軍謀起漢上事敗駿堂時管帶院署衛隊捕蕪人最力黨中尤恨之至是自益陽拘至省城徇於市駿堂罵不絕聲衆憤怒叢擊斃之并籍其家鍾麟字書春蒙古正白旗人光緒二十九年進士用知縣發湖南補瀏陽攝永順宣統二年調嘉禾省城難作銜永郴桂道通令輸

欵麟聞大慟即集士紳謂曰麟泣縣經歲無德於民今國亡城危請諸君先殺麟以謝百姓幸縣城不罹兵禍死無所恨皆相顧錯愕爲好語慰之九月二十一日民軍圍縣署鍾麟坐堂皇層金自盡預伏火內室妻邱氏燬焉兩子及次子婦均遇難典史何永清字澤溥四川新津人捐典史發湖南懋權州同州吏目屏絕規費胥役畏之嘗於除夕有富商以金爲壽請繫一負債者永清曰除夕人皆歡聚我拘之非人情我受金而使人一家皇皇尤非此心所安峻拒之其廉介類此變作誓與鍾麟死守或有詔永清者謂邑侯旗籍民軍恐不相容公幸自愛有變當奉公主縣事永清謝之不爲動道令至永清痛哭懸印於肘自經死沈瀛字士登江蘇吳縣人嘗刲臂療母疾以勞保知縣嘗從湘撫吳大澂出關事轉運絲毫不自潤累署武陵長沙奏擢知府宣統二年春長沙以米貴築事焜撫署以瀛前任長沙得民心復令攝任緝匪振貧省城復安三年八月充營務處提調新軍既變黃忠浩被戕瀛方出巡新軍遮入諮議局請爲長沙守不可請仍宰長沙又不可錮諸室令所親勸之至泣下瀛曰官大清州縣

二十年一朝背之異日將何面目見人乎言已大哭與前湘鄉知縣城固申錫綬同忍飢以死節相勉黨人知不可屈擁二人出罵不絕口同死之時長沙協都司熊得壽爲人狙擊死忠浩自有傳

世增字益之爲祖大壽後隸正白旗漢軍由生員入同文館通法文隨使英俄諸國歷保道員加布政使銜嘗譯西藏全圖西伯利亞鐵路圖進呈光緒三十二年授甯紹台道外務部調丞參上行走二十三年授交沂曹道擢雲南按察使調交涉使宣統二年擢布政使三年七月調甘肅未行而革命雖作時新簡演藩未至或諷世增速交替可脫險以義不當苟免辭之事亟法領事韋禮敦勸入領事館又謝之有愾世增者則曰人孰無恥安有一省大吏求庇外人者得死命也揮眷屬出獨抱印不去九月十三日兵變世增夕懷印步謁總督李經羲僕紀祥從總督拒不見乃歸出手槍自擊紀祥遽奪之悲曰汝誤我軍隊突入擁至講武堂索金助餉斥之韋禮敦聞訊來視且允代任餉銀二萬變兵略無圖害意夜半槍聲作楊某給守兵謂電請大兵且至衆遂叩寢門迫世增

爲都督且以槍擬之卒不應排槍起中五彈死紀祥圖殉衆義之獲免乃市薄
樸斂事上聞贈巡撫諡忠愍石家銘字訂西湖南湘潭人治刑名游滇佐大府
幕凡邊防阨塞及通商各國科條章約靡不諳究雲南自界連英法領土交涉
尤繁文書往復惟家銘隨方應付動中窾要歷任總督皆倚重之以縣丞累擢
知府宣統元年補昭通三年調激江尋改開化視事數月審結滯獄數百起多
所平反九月十五日巡道所募新兵驟變署中僅哨弁李世清率衛兵二十人
守禦相持竟夜子彈盡仰藥不死和金府服之又不死乃令世清然火油以身
投入世清哭隨之遂共焚死世清雲南人琦璘滿洲鎮紅旗人由部曹選授雲
南激江府知府調補順甯嚴正廉潔對屬吏不少假借省城兵變正籌議集兵
往剿先是順甯縣令蕭貴祥疏脫要犯援例上劾貴祥銜之至是結巡防營乘
不備入城貴祥假他事請琦璘至文昌廟會議突起圍之琦璘理論不退遂大
罵衆怒遽開槍擊殺之城中大亂貴祥遁去毛汝霖字澤卿四川成都人雲南
候補知州宣統三年權永昌府釐金代行知府事九月初六日騰越兵變永昌

民大震集民圍守禦十二日電傳省城變作知事不可爲仰藥死營官羅某民軍入城不屈被害碎其尸胡國瑞字瓊笙湖南攸縣人舉人光緒二十九年挑知縣發雲南始攝霑益知州清積訟逾百三十三年署彌勒縣多盜易八令不能治告成將我行君繼之出不意可禽也如其策破賊巢禽其渠斬之明年大潦獨振並舉以循績上聞被旨嘉獎旋補江川擢大關廳同知皆未之任時請修墓歸里既受代矣變作道家屬行寓子書曰省垣不守布政使被戕餘無殉節者臣子之義萬古爲昭子雖無守土責然實官也俟北信當死即死旬日後訛傳京師破明日有汲於署東井者井上有雙履往視之則屹立井中死矣背有遺書曰自經不死又復投井又書曰京師淪陷用以身殉達人不可取愚者終不失爲愚於是縣吏棺斂之邑人請封其井題曰胡公井張舜琴字竹軒雲南石屏州人舉人選昆明縣訓導講正學尙名節士皆敬之擢順甯府教授事繼母孝迎養學舍顏其堂曰不冷監師範學校人疑舜琴改平時宗旨及觀其學規嚴肅壹準禮法皆翁服外國教習亦僉曰張先生正人學使葉爾愷調充學

務議紳變作有令剪髮即夕闔戶仰藥死

鍾麟同字建堂山東濟甯州人威海武備學堂畢業治軍嚴整累保道員以營從軍龍州調入滇充陸軍第十九鎮統制官宣統三年九月初九日七十三標兵變夜半自北校場入城麟同率衛隊扼五華山手發機關礮斃者數百而七十四標駐巫家壩者應之更迭戰山下軍械局員陰與之合移巨礮城上攻五華蟻附上衛隊傷亡多子彈亦盡突圍轉戰慨然曰身爲統將乃破壞至此何面目生存耶以手槍自擊而仆變軍碎其尸剖心啖之上聞有忠骸支解慘不忍聞之諭諡忠壯同時死難者輜重營管帶范鍾岳字靜甫直隸鹽山人力戰死七十二標標統羅鴻奎直隸天津人被執不屈死七十四標副官張之泮直隸河間人遇毒死七十二標第三營管帶張恩福直隸靜海人大罵被害孔繁琴字韻笙安徽合肥人以文童投武衛軍入武備學堂畢業充哨官庚子拳亂扈兩宮西狩與兄繁錦殿後奪回龍泉關名以起營調廣西幫辦紹字營駐柳州營本降匪改編將調入城疑而譁變戕統軍繁琴奮擊之殲甚衆又調廣東

管帶巡防隊惠州匪聲言欲投誠脅紳求一見繁琴盛服單騎往覺有異出匕首刺之立斃匪黨將致死援者至乃免地方亦以匪首死始不復擾歷保知縣宣統元年調雲南充蒙箇防軍分統以勞補靖邊同知又以賑獎知府民軍之變獨率一營扼普雄軍至急與戰死甚衆已而左膝中彈傷弁兵請退怒以槍擊之所部遂潰僅七人死守不去民軍中有素重繁琴者說之又以槍斃數人乃大憤發一槍問降否曰不降累問之答如故至十三槍乃中要害死管帶張榮魁與繁琴本同學是日亦戰死榮魁亦安徽人王振畿字化東山東滕縣人天津武備學堂畢業充哨長累擢至統領改道員入滇總辦兵備處治軍有節制變作欲墜城死僅傷左股遂被執勸降不從見害張嘉鈺字武平湖南鳳皇廳人起世職累官至總兵宣統三年署騰越鎮武昌變起有自省遣嘉鈺書諷其達時變者嘉鈺謂我所知者與城存亡而已其他非我所能行亦非所忍聞也未幾騰越防軍起應民軍九月初六日圍鎮署出堂皇彈壓兵猝入被戕

陳兆棠字樹甘湖南桂陽州人父士杰山東巡撫自有傳宣統三年兆棠官惠

州府知府九月粵中黨人起應武昌總督張鳴岐遁香港民軍遂踞省城設軍政府潮州鎮趙國賢自盡死所統防軍擾亂守道知縣皆逃士民懼堅留兆棠收撫防軍部署未定二十八日民黨糾衆攻府署火及宅門左右挾兆棠出民軍懸賞購執令輸餉十萬貸死兆棠曰死則死耳安有鉅金助爾謀反衆怒縛之柱中十三槍乃絕國賢自有傳馮汝楨字萊雲浙江桐鄉人以諸生捐知縣發廣東椎商獄咸舉其職宣統三年七月攝西甯廣州變起黨軍闖縣署脅汝楨懸白旗示歸順持不可俄而槍聲作乃朝衣冠出大堂衆爭前槍刃交集洞胸穿脇斷右臂死之何承鑫字性存湖南湘潭人少治說文學光緒六年學政陶方琦按臨長沙以潔字爲題承鑫徵引詳贍文譽以起光緒季年廣東陸路提調秦炳直招入幕於軍事多所贊畫時提督駐惠州以總稽查任之宣統三年八月革命軍起惠及鄰境匪皆蠢動聞營官有通敵者密告炳直而營務處劉殿元以全力護主帥自任否則借死承鑫感其意以首觸地謝之亡何餉匱薪米竭援師不至承鑫以死自誓城陷夕歸私室自書絕命時日置衣帶中

並遺書誠子自經死炳直上聞以忠義可嘉褒之

白如鏡字顯齋隸鎮黃旗漢軍由筆帖式補鑾儀衛官出爲興甯營都司宣統元年署潮州左營游擊兵變不屈死何培清字鏡亭廣東歸善人入提標補千總光緒三十四年領連和防營提督秦炳直才之調博羅剿羅桂幫匪盡殲之會鄂變粵應之民軍猝集攻博羅培清以三百人登陴守兩晝夜敵不得逞奸民開門迎民軍執培清不欲死之甫出猝遇羅桂餘黨出不意狙擊死之時又有黃兆熊者名家段以字行湖南湘潭人久從秦炳直爲惠安水師營哨官博羅既失民軍薄惠州兆熊被調入城守三日目不交睫城陷傳提督被害悲憤不欲生時全城搶攘獨攜槍至城堞間以足趾觸槍機洞貫胸腹死張德潤南雄人以千總充香山巡防營管帶官革軍入縣城守南門力戰援絕被執殺之投尸江中嘉應州游擊柏某時亦以兵變遇難

張振德并失其籍廣西候補知府充巡防隊統領十月潯州亂率師至黃茅規進剿衆寡不敵中槍死時南甯府知府攝思恩府舒志亦以兵變死之

來秀字樂三姓聶格里氏滿洲鑲藍旗人由繙譯生考取筆帖式歷官刑部屢
決疑獄充軍機章京三十三年出知汀州府大吏議加汀鹽價力爭罷武昌事
起福建響應總督松壽殉難全省無主來秀在官多惠政士紳憂來秀滿洲爲
人指目謁請護避汕頭來秀以大義自矢不之允九月三十日郡城驟懸白旗
來秀知事不可回朝服坐大堂北向叩頭仰藥死松壽自有傳劉念慈字晉芝
湖北鍾祥人由廩生選教諭俸滿以知縣發福建補永安福州既亂土匪倚山
險聚衆數百人念慈募勇督剿匪負嵎抵抗勇被槍死念慈亦重傷爲匪擄去
索銀幣取贖念慈卽遣人持絕命書歸且曰慎毋來贖以增羞貽累卒絕粒
不食死李秉鈞漢軍正白旗人由膺錄敘知縣選秦甯有治聲革命變作慨然
曰國亡與亡義也第縣治無官民將失所召紳士議保衛法既定仰藥死繼妻
烏蘇氏亦仰藥殉之王榮綬字笛青湖南善化人以軍功起家官甘肅光緒二
十八年改選連江縣知縣嚴於捕緝黨人莫敢留縣境受代厲省城被拘至軍
政府責以前事抗辭不屈被害

定煊福州駐防諸生有幹略官佐領武昌變起將軍模壽日料軍實簡卒伍旗民能勝兵者皆授以兵而任定煊爲捷勝管管帶日夕操練防軍圖變於九月十八日揚言旗營將開礮洗城以懼衆四鼓礮聲隆起分撲軍督兩署模壽親督所部血戰兩晝夜防禦長瑞驍騎校巴揚額主軍晝發憤從戰相繼殞於陣前者僵後者繼變軍不支漸引卻偵利槍巨礮皆在于山定煊從模壽於二十日夕短衣草屨督死士嬰山壘深入中礮死長瑞巴揚額均繙譯舉人同隸駐防之前鋒森俊蘇都里達哈使尙阿里領催桂斌慶銘舉人松音均陣亡教員麟瑞舉人裕形與兄筆帖式裕豐族兄哨官鑠欽額均殉難模壽自有傳

王有宏字金波直隸天津人同治五年投効銘軍充兵目自平定髮捻餘孽與勦臺灣番社法人攻臺灣諸役均隨軍有功擢至游擊日本渝盟奏調山海關辦防務和議成入江南防營以緝梟匪勞記名總兵江蘇巡撫鹿傳霖器之從入秦扈從兩宮回鑾尋爲河南巡撫張人駿奏留倚以練軍人駿督兩廣移督兩江皆從管江南緝捕營兼統總督衛隊宣統三年八月湖北告變檄統選鋒

十營會提督張勳江防軍守江甯嘗請率三千人赴滬守製造局斷蘇杭鐵道未果無何江蘇巡撫程德全宣布獨立率兵攻江甯提督張勳與戰頗勝而變軍別出一支攻督署有宏以機關礮擊却之十月初旬德全以江浙聯軍至廬集薄城有宏馳出通濟門以三百人戰民軍以遠鏡測知有宏所在發槍子中左腹猶植立督軍士進擊左右昇至醫院乃絕電聞贈太子少保諡壯武何師程字雲門由襲騎都尉擢副將保總兵補江南督標中軍十月十二日甯垣陷自戕黃凱臣本名彩以字行江蘇江都人入徐寶山虎字營爲哨官敘功至游擊以事去職至賣茶自給武昌變起江甯將軍鐵良添募十營助城守凱臣領其一省城既陷各營相約懸白旗凱臣語所親曰城不守而相率降附吾實恥之聯軍至橫刀大呼殺敵馳入陣被戕戚從雲徐州人由行伍官千總隸江蘇巡防營以能緝捕名蘇滬獨立時從雲率巡防一營駐黃渡抵抗不從遂爲民軍所戕

盛成字挹軒本荊州駐防同治初金陵克復調江甯山驍騎尉累擢鎮黃旗佐

領民軍攻江甯知城不可守約知交城破各挈孥就火藥庫謀同死十月十一日城破有言繳械免死者衆要盛成往不應率子婦趙孫國瑞女三赴藥庫搗酒痛飲炷香以待炸發哈耶阿字叔芬素與盛成善聞之亦挈妻張子成仁成義女一往同時燬焉旁近旗民無老幼男婦巨響一震死不知數南山字壽民充貼寫累擢防禦初從將軍鐵良駐軍北極閣城破知同僚集都統署馳入言曰吾輩受國厚恩今宜發天良背城一戰不濟則以死繼之無應者出召軍士語如前亦無應者恚甚發槍自擊死妻某聞南山殉節抱其子縱火自焚死培秀字希賢先以襁褓子授其戚以阿芙蓉膏飲一女一姪女夫婦自焚死防禦松柏與妻子女八人驍騎尉恩鈞夫婦副前鋒寶林全家防禦長年均自焚死隸某旗洪某閩雙先以妻女投官井與同居劉永祥閩室舉火自焚洪失其名永祥微者也中學教習興發約同營前鋒錦秀同投塘水死小學校長富勒渾布嘗以世濁獨清誓與屈靈均爲伍有欲縛獻民軍者躍入水猶抗聲語曰吾今日遂吾志矣不受援死防禦嚴德海驍騎校愛仁阿榮生均率妻女子婦千

總色勒善夫婦佐領廣照世職關秀崑相率投水死防禦果仁布城破自盡世職鹿鳴自經死隊官汝霖彭興教練官恩錫執事官魁穩均以不屈被害陣亡者爲驍騎尉趙金泉教練官鵬興排長海祥礮隊官趙壽昌被戕者千總富有世職金鑫祥泰韓萬興鴻錫侯恩俊卜金海永潮韓萬富文生衣吉斯渾凡旗兵戰死及眷屬與難見姓名者數百人事定掩埋叢冢凡十三處其數不可稽生員長明以在杭州武備學堂肄業爲同學斫之死

桂城字仲藩姓伊布忒克氏蒙古鑲紅旗人世京口駐防由生員入將備學堂考送日本振武士官諸學校入聯隊實習調江南爲憲兵協軍校管陸軍警察營宣統三年九月變作遺妻子槍令自裁族人在軍者咸勗以大義時第九鎮統制徐紹楨駐秣陵關往謁知桂城不與同志也拘荒祠中新軍敗兩花臺遂怒桂城擁之出中數槍死後二年補設剛愎延浩字子餘蒙古依羅特氏漢姓文既老赤面白鬚善騎射如少年官協領以原品食俸載穆殉節默不語具衣冠北面再拜僵臥不食卒文蔚字子貞蒙古人同治初從將軍都興阿軍累

擢佐領變作家人勸出避誓死不應一夕痛飲哭不止家人謂其醉也中夜遽卒蓋陰以毒物自戕矣年八十協領余世寬驍騎尉恩厚同源佐領春濤延熙防禦貴慶延福前鋒錦章炳炎領催東臬德慶延昌松廷三元錫昌雲騎尉良弼師範學校校長崇樸生員崇椿同以絕食死防禦吉瑞嘔血死領催德箴自經死前鋒鍾祥遠邦領催慶耀陞奎國能殿倫發昆五品頂戴發元生員穆都哩同自經死前鋒德尙領催清泰投江死舉人恩沛吞玻璃死佐領榮康德興普亮前鋒國棟和庸及弟啟瑞領催文光延熙及弟延本海春恩騎尉延章西登佈武舉人炳南生員喜德師範畢業生錫蕃均受傷死安徽縣丞壽餘及二子德興德祚同日遇害其被調江甯者排長國權海靖文馨啟貞與桂城同日死排長炳陞守北城戰死馬兵那康元遇敵軍南門搜軍械不服縛於樹支解死

高謙字敬亭湖南沅江人同治季年從左宗棠度隴司書記以勞保縣丞發安徽光緒八年宗棠督兩江委謙准北督銷分局連任十有七年鹽商饋遺皆不

受受代典衣裘而行商民頌之三十三年補安徽阜陽縣丞清嚴不妄入民間
一錢知縣有過舉輒陰爲規正民尤愛戴之宣統三年九月二十五日安慶變
作變兵旋入阜陽左右勸謙引避厲聲斥曰名位雖卑大節不易吾豈苟活者
耶卽夕飲鴆自盡凌晨家人入視則衣冠端坐氣絕面如生年七十有四民間
之皆走哭議立祠祀之因亂未果

黃爲熊字子祥江西德化人由舉人挑知縣發浙江署於潛再署東陽民好訟
積案千百排日決事民畏而感之署蘭溪除盜匪殆盡益興學重農治行上聞
被獎省城變作聞之欲自裁翌日聞訛言謂京師陷大慟曰主憂臣辱主辱臣
死何顏見地方人民耶亂民來奪縣印正色諭之不許抱印自經僚友趨救氣
已絕面如生文海字雲舫漢軍鑲藍旗人山拔貢生用知縣發浙江一攝長興
充勸業道科長新軍變入寓搜軍械得洋槍將繫之文海發槍斃一人傷二人
出報其黨被收慷慨不屈引頸受刃死趙翰階字春亭山西祁縣人父受壁奉
天昌圖知府有惠政翰階隨侍邊塞習騎射以任俠重鄉里拳匪之變嘗乘垣

斃其酋增韃素與習官浙江巡撫令充衛隊管帶杭垣變作撫署被圍率猶子趙錦標等突圍入護巡撫家屬穴牆匿民舍明日聞巡撫爲新軍所拘往救之翠錦標持手槍出爲變兵所執曰我北方男子豈畏死者遂與錦標同被害

貴林字翰香滿洲正紅旗人杭州駐防官協領與浙人士游有賢名浙兵變駐防營猶抗拒相持二日浙人勸罷戰招貴林出營議事垂定有陷之者謂旗營反覆不可信且誣貴林置毒各坊巷井中變軍誘之出槍斃之同出者子量海舉人存炳佐領哈楚顯同被戕

額特精額字蔚如杭營正紅旗防禦駐守武林門辛亥九月十四夜變兵強令開城額特精額喝問何人以革命黨對遂斥曰汝等狗也我不死城不能開獨持槍擊衆衆環攻慘剝死暴尸數日居近商民始殮之文榮字如山蒙古巴岳特氏世襲雲騎尉變兵攻旗營三日堅不下使來議和合營官兵願効死力爭將軍德濟遽遣貴林出許之官兵皆擲槍軍署痛哭散去文榮憤不欲生手書十六字曰杭營失守忠義掃地清流北向是吾死所遂投河死迎喜號壽芝滿

洲鑲白旗人年八十餘矣富議和時詣軍署以死爭大呼曰八旗受國恩三百年今事至此若輩猶欲視顏倫生乎遂歸閉戶自經死金海正藍旗前鋒校變兵架巨礮吳山遙轟旗營衆議改城馳奪之金海願從戰聞議和遂棄械于河亦自經死希曾正藍旗監生前南昌知府盛元孫變兵入營多劫殺希曾斥之曰既議和矣奈何猶爲盜賊行衆怒擊竟剝尸如泥時旗人皆自危頗有無故被殺者其姓名不能盡詳矣

玉潤漢軍鑲紅旗人光緒季年以變儀衛治儀正出補秦州營游擊武昌事起甘肅僻遠總督長庚素持鎮靜聞陝西擾亂乃戒嚴時有道員黃越者宿與南方黨人通充軍事參議欲通陝中民軍謀獨立以陝中民軍屢敗乃陰引川軍入甘爲援玉潤偵知日與守備習斌籌守禦以限於兵額末由增募是時南北欸議成甘陝電斷不相聞鈇於秦州各官獨憚玉潤忠鯁壬子正月二十三日遂率衆入城據各署局而以兵圍游擊署玉潤列隊出拒身自督戰終以兵少不敵玉潤中槍殞於陣

勞謙光字佩蘭山東陽信人少讀書有用世志入北洋武備學堂畢業山西設武備學堂聘爲教習管帶馬隊管帶知縣遂官於晉新政初始若督練處警察學堂並充提調官數歲移充北洋常備軍第三鎮參謀官兼軍需官擢第六鎮工程管帶官武漢變起率工程營赴前敵築橋漢上將以濟師敵爭之力礮子兩下躬督視不卻猝中礮死時十月初六日死而橋卒成清師得渡復漢陽清廷主兵者遂有停戰之議吉陞字允中滿洲鑲黃旗人以學生官本旗前鋒入海軍學習積資充海籌兵艦幫帶官湖北告警海軍奉調赴援至者兵艦十五艘魚雷艇二艘清軍攻漢陽海軍助勢而礮發多不命中未幾言煤罄相率下駛九月二十一日海籌與海容海琛三巡洋艦奉令離漢口二十三日抵九江時江西九江已響應武昌海容海琛遂相約懸白旗停泊海籌管帶喜昌不欲邀吉陞同遁吉陞潛然涕下曰國家經營海軍四十年結果乃如是耶發憤投長江死

張程九字子澧奉天台安人由歲貢考充盛京宗室學教習任滿以知縣用宣

統元年選爲奉天諮議局議員三年九月鄂變起地方不逞之徒假改革名義
狡然思逞台安齊某糾衆將起事惲程九持正不敢發程九聞警至省謁總督
趙爾巽請派隊勦辦免塗炭地方爾巽允其請並令回縣辦鄉團以資捍衛程
九歸經縣西佛牛彖爲羣賊所伺設伏遇害卹贈知府賞世職

王文域字伯若四川人知山東樂安縣辛亥冬爲變兵所戕黑龍江海倫府巡
防馬隊管帶官譚鳳亭於十月陣亡有旨優卹伊犁將軍志銳被戕僕呂順以
樸誠著臨難護主同死之從死者武巡捕官劉從德四川人教練官春勳京旗
人志銳自有傳

張傳楷字睿斌直隸青縣諸生充宗人府供事敘勞得知州革命事起舉朝震
恐自親貴達官而下惟日以徙家入外人居留地爲事傳楷憤甚詣都察院上
說帖請代奏院官無在者止院門哭三日無一官至遜位詔下拔所佩刀自戕
死自銘十六字曰成仁取義孔孟所垂讀書明理舍此何爲孫文楷字模卿山
東益都人同治癸酉舉人潛心著述尤精金石之學以收藏貧其家力耕自養

恒屢歲不入城市有適野集一笑集皆詠田事詩也遜位詔下家人秘不以聞
經月忽入城訪友歸即仰藥自盡將死屬其子曰吾行吾所安耳毋謂我死節
也著有老學齋文集二卷今吾吟草四卷稽庵古印箋四卷古錢譜等書王乘
龍字少枚福建龍溪人安貧好學以歲貢生授經里中閩軍應武昌乘龍感憤
彌日不食翦髮令下長至謁宗祠宗人勸之乘龍不一語入夕乃潛設香案自
經死案上遺詩曰膚髮千鈞重綱常萬古新毀形圖苟活何以見君親年六十
有一趙彝鼎字煥文江蘇江陰縣諸生好程朱之學武昌變起蘇撫程德全應
之憤痛絕食十月初九日出而不返明日家人跡至三賢祠樓則衣冠北面懸
梁問氣絕矣檢篋得遺筆千餘言有曰我死合君臣之義冀斯人不以我君爲
滿洲而漠視之願國家大兵早至反正者免脅從者赦又曰我爲國故不死於
家會文講學地正欲以明人倫也施偉字卓齋江蘇高淳縣諸生傲岸絕俗以
兄喜譚新學心非之遜位詔下大慟壬子元日具衣冠拜家祠自書輓句祠壁
投塘水死李澤霖字卮兩廣東香山縣諸生教授生徒以小學近思錄爲日課

聞變絕粒五日死先手書清處士李郇兩墓七字授其子俾刊墓道且命二子
母入學校母出仕胡穆林失其名湖北江陵縣諸生變作上書荊州將軍譏戰
守事將軍壯之時電報被燬具乞援贖令賞以北行至資福寺爲通敵之警察
所偵繫沙市敵管詞之曰汝漢人奚助滿人爲穆林叱之遇害杭州望江門有
更夫某者夜鳴鉦巡於市變軍自城外入方昧爽猝見之急鳴鉦大呼兵反狂
走向官署冀警備軍訶之不止追及槍擊之立斃

梁濟字巨川廣西臨桂人父承光卒官山西貧不能歸寓京師喜讀賊繼光論
兵書賢名臣奏議光緒十一年舉順天鄉試時父執吳潘祖蔭濟奪孫毓汶皆
貴濟不求通迨毓汶罷政始一謁之大挑二等得教諭改內閣中書十餘年不
遷舉經濟特科亦未赴三十三年京師巡警廳招理教養局濟以總局處罪人
而收貧民於分局更立小學課幼兒俾分科習藝設專所售之費省而事集由
內閣侍讀署民政部主事陞員外郎在部五年未補缺遜位詔下辭職家居明
年內務部總長一再邀之卒不出歲戊午年六十諸子謀爲壽止之不可避居

城北隅彭氏宅先期三日昧爽投淨業湖死時十月初七日也遺書萬餘言惓惓者五事曰民曰官曰兵曰財曰皇室區畫甚備予設貞端有吳寶訓者字梓箴蒙古人嘗爲理藩院員外郎素與濟游聞濟死痛哭越日亦投淨業湖死簡純澤字廉靜湖南長沙人父桂馥純澤生七歲卽出嗣伯父敬臨敬臨以總兵從左宗棠軍攻金積堡叛回戰死諡勇節賜騎都尉世職純澤自幼吐棄俗學嘗入粵從西人習軍械製造法桂馥客游新疆久不歸迄二十餘年無耗純澤乃以製職從度隴軍欲遂出嘉峪關覓之隴督以荒遠堅阻而行文地方官搜訪卒不能得則大痛謂他日不求死鄉里也入陝西爲布政使升允所重庚子升允率師勤王純澤與營官歐丙森從遇夷兵正定斬數百人疾作聞丙森戰死力疾請戰升允尼之上書責升允詞甚直正定令將迎夷師入下令軍中嚴陣待夷懾之解去升允撫巡撫檄管武備學堂兼領新軍後復檄充新軍教練官會後撫以貪黷聞非門金不得通積二歲不往又與道員王毓江議軍事不協謝歸里國變後居數年悲咤不解丙辰夏北行之京師旋客天津後一年

至煙臺游煙霞洞去之威海投海死獲其屍有自書絕命詞以樹墓碣鐫大清
遺民四大字爲獲屍者告感其義斂而葬諸海濱且立碣焉

王國維字靜安浙江海甯州諸生少以文名年弱冠適時論謀變法自強卽習
東文兼歐洲英德各國文並至日本求學通農學及哲學心理論理等學調學
部充圖書館編譯名詞館協脩辛亥後攜家東渡乃專研國學謂尼山之學在
信古今人則信今而疑古變本加厲橫流不返遂專以反經信古爲己任著述
甚多擷其精粹爲觀堂集林二十卷返國十年以教授自給壬戌冬前陝甘總
督升允薦入南書房食五品俸屢言事皆褒許甲子冬遇變國維誓死殉駕移
天津丁卯春夏間時局益危國維悲憤不自制於五月初三日自沈於頤和園
之昆明湖家人於衣帶中得遺墨自明死志曰五十之年祇欠一死經此世變
義無再辱云云設忠愍海內外人士知與不知莫不重之